

KUKUNA MWONJI WA MVINYO

NÈ MWABA WA KUWUKUNYINA

 Tudi nè bintu byàbúngì be, kàdi Wèwè udi mumanyè bulelèlà mwoyi wètù nè mumanyè byònsò bitùdi naabi dikèngela. Tudi nè disànkà dyàbúngì dyà mutùdi mwà kuKutwàdilabì mu disambila, bamanyè nè Wèwè udi umvwa nè neütüpèshè bwímpè Bwèbè; kí nnè tudì bacikumbànyine to, kàdi bwalu Wèwè ngudi mutùlayèci. Ndi mutwishìibwe nè kùdi malòmba àbúngì mu èkèleeziyà mu dindà emu, bwà mabèèdì nè bàdi mu lukèngelu. Nènku tudì baswè kuKutwàdilawù nè didipwekesha dyònsò mpindyewu mene, tulòmba luse Lwèbè lujaalàme nè bukolè bwà dyondopa, bwà yònsò wa kùdibo.

² Tudi kàbidì tusambila bwà bàdi munkaci mwà kusangala nè aba bàdi kabàyi mwà kuya ku èkèleeziyà mu dindà emu. Kàbidì, bwà bààbúngì bàdi badisangishe kaaba aka mpindyewu. Bààbúngì bàdi bàsaama nè biikàle mu lukèngelu. Tudi tubàmòna nè mabaya à balèmà nè mu tùkalù, nè tùkalù twà balèmà, nè bàdi—bàdi dijinga nè luse Lwèbè. Tudi tulòmba, Mukalenge, bwà Ûbènzèlèci, byà biyiila nè panshì. Swàkù bwà bàpatukè mwab'ewu, bènda bàcyònkomoaka, bøndopiibwè nè bàsangalè. Bààbúngì bàdi kabàyi bàleeja ntàtù yàbò to, kàdi, nànsha nànkù, pàmwàpa disaamà dyà mwoyi dìdì ànu dyàmba kubàngata, anyì kànsèrè, anyì démon kampàndà wa ùkwàcisha bwòwà. Tudi tulòmba, Mukalenge, bwà yèyè kuumushiibwa mu dindà emu. Nebàpatukè mwab'ewu, nè disànkà, basàngalè.

³ Tudi bafwànyine kuvùluka mwànà mukesè wa balùme udi—udi upùnga nè lufù awu. Báfumu ku ditwambila, kùdi munanga kampàndà, udi nè kànsèrè nè mufwànyine kufwà leelù, luse Lwèbè lwólò kalùyì lwalàbàjìibwe pa mwànà awu. Èyì Mukalenge Nzambì, ikàlàku nè luse kùdi mwànà mukesè wa balùme awu. Musùngilekù, Mukalenge; pùikalàbi nànkù awu mu diswa Dyèbè dyà Bunzambì. Tudi nè disànkà dyàbúngì bwà bujaadiki bwèndè, bwà nè yèyè mmwìtábe Mashi Èbè, mu mùshindù wà nè wàkalòmba tatwèndè bwà kumujiikayè mulwàte bilàmbà bikúnze, bwà bààmònakù mwà kumanya nè ùvwa mubwikila kùdi Mashi. Tudi tuKusàkidila, Mukalenge, bwà diitabuuja dyà bukitù bu nànkù dyà bilòbo bikesè, byènda bitàngile kumpàlà bwà kutuutakeena nè ndekeelu wa mwoyi, buupùkile nkùrusè mu myoyi yàbò, nè kwine aku bàleeja cimanyinu cyà Mashi. Bu byòbikù mwà kwenzeka, Mukalenge, lamàku mwànà mukesè wa kambodyoto awu, swàkù bwà ikalè nè mwoyi. Tudi balòmbè bwà bakwàbò.

4 Nè pashìishe, Mukalenge, tudi tulòmba bwà masangisha à mu dindà emu. Kùdì bàmwè kaaba aka, pàmwàpa, bàdì kabàyi baKumanyè bu Musùngidi wabò to. Byòbì biikàlè nànkù, swàkù bwà edi diikale ditùkù dyàKusanganàbo wa musinga mukolè bwà nsòmbelu wabò, bu Musùngidi. Aba bàdì dijinga nè dyondopiibwa abu, bàKupetèku bu Mwondopi. Mukalenge, swàkù bwà Ùlwe kùdì musadidi Webè, mu dindà emu. Swàkukù bwà nkupetè Wèwè bu Muiyishi. Bwalu, tudi tuKulàmbula byònsò ebi, tulòmba bwà Wèwè kwandamuna mu Dìnà dyà Mukalenge Yesù. Amen.

5 Tudi misangu yònsò ànu nè disànkà dyà kubwela mu nzùbu wa Mukalenge, nè ku Disangisha dyà Bânàbutè. Nènku mvwa, bu pa ciibidilu, ànu mu lujòòkò. Ncìvwa ngèla meeji nè mvwa nè cyà kufika mwab'ewu to, ànu bu mèmè mwà kulomba bapìci bàà nè màshinyi bwà kungambulabò. Eci's necìsekeshèkù mukàjàànyì menemene. Mmusòmbè kaaba aka, mwaba kampàndà. Ùvwa muumùke mu dindà emu, nènku mvwa nsanganyibwa mu nzùbu wa mwînshì mwà buloba munkaci mwà kulonga. Ke yèyè nè: "Ndi nè nsapi, Billy." Ke mèmè kufika ku dijandula nè, yèyè nguvwa nè nsapi yà ku citèekedi cyà màshinyi, kàbidi. Ncìvwa nè mùshindù wà kubwela to. Mvwa mupicìle mu cikondo cyà bwalu bukolè.

6 Kàdì paanyimà pàà katanci, pàbèngi Billy kummòna, ke kwambayè nè: "Ndi ndikonka nè mbwà cinyi yèyè kí mmwanji kulwa." Ke kumbiikilayè.

7 Mèmè nè: "Lwàkù lùkàsà menemene." Mèmè nè: "Bwalu ncyèna nè mùshindù wà kulwa mu èkèleeziyà to." Pa nànkù tudi. . . Ndi nè disànkà dyà kwikala kaaba aka. Pa nànkù, ndi mufikè nè lujòòkò.

8 Kàdì, nudi bamanyè's, patùdì tubwela mu cipaapu cikwàbò aci, mùdì cikondo kaciciyikù kàbidi to, tudi tubanga kupwà mwoyi bwalu bwà dîbà. Byònsò abi bìdì bìbwelakanangana mu Cyendèlèlèlè, nè kakùciyi kàbidi cikondo to. Kakùcyena kàbidi mikalù yà cikondo to.

9 Pòlò ùvwa nè cyà kwikala nè cintu kampàndà cyà mùshindù awu mu meeji èndè, dilòòlò dyàkayiishàye bufùki bujimà abu. Mwànà wa balùme kampàndà kukùlukayè ku nzùbu aku nè kufwàye. Ke Pòlò kwadijayè mubidi wèndè pambidi pàà mwànà wa balùme awu, ke mwoyi kwalukilawù cyàkàbidi kùdì mwànà wa kambodyoto awu.

10 Ngèla meeji nè mbangambile, kùdì mpaasàtà, ànu mpindyewu ewu nè, bàdì nè mwànà mukesè wa mu dibòko udibò baswè kulàmbula mu dindà emu. Pa nànkù bu maamù mwà kutwàla mwànà mukesè awu, mpindyewu mene, netùmulàmbulè Mukalenge, ní ngwa balùme ní ngwa bakàji, cyònsò cidiye mwà kwikala aci. Nènku ntu ànu bu muswèku midimu yà dilàmbula

ayi. Udikù mwà kuseemena kumpalà eku anyi, Mwanèètù Neville?

¹¹ Wetwàwu, mwanèètù wa bakàji. Dyà mwànà mukesè awu nganyi? [Mwanèètù wa bakàji ùdi wàmba nè: “Frank Wayne Dabney.”—Muf.] Frank Wayne Dabney. Kwèna bulongo nè Robert Dabney to, mmwòmò anyi? Frank Wayne Dabney, ùdi nè bidimu búngì munyi? [“Mbingu mwandamukùlù.”] Mbingu mwandamukùlù. Kí mmwànji kwenza ntàntà mule mu buloba bwà cikisu ebu to. Èè, yêyè’s ke mamuma è disangila dyènù. Nè mpindyewu udi muswe kumulàmbula Nzambi, bwà wàmòna mwà kwikala musadidi Wendè. Ncyà bushùwà anyi, mwanèètù wa bakàji? Nzambi àkubènèshè.

¹² Èè, ndi mwambùle bubanji bukesè mwab’ewu, mulenga wa dikèmà. Anji mutàngilaayibi’s, Frank Dabney mukesè awu.

Tùsambilàayi.

¹³ Taatù wa mu Dyulu munanga, mu matùkù à lwendu Lwèbè pa buloba apa, mu mmwènekèlu wa muntu, uvwa ubiikidiibwa nè Mukalenge Yesù, bàakakutwàdila bàna bakesè. Nè Wèwè wàkabàtentekela byanza nè kubàbènesha, nè kwamba nè: “Lekèlaayi bàna bakesè bàlwe kùNdi, nè kanùbàkàndiki to, bwalu Bukalenge mbwà bàdi bu bóbò aba.” Maamù ewu nyèwù ùfla mu mabòkò àànyì, mu dindà emu, mwànà mukesè wa balùme ewu, ùndi nKulàmbula ewu. Ndi ndòmba, Mukalenge, bwà Wèwè kubèneshakù mwànà mukesè ewu. Bènesàku dikù dyèndè. Swàkù bwà àkoleshiibwè mu dikù dyà beena Kilistò. Swàkù bwà àkoleshiibwè, mu mibelu yà Nzambi. Nèku kwòkò kwikale màalaba, àyiishèku Èvànjeeliyò ewu pìikalàbi bilongolola nàнку Kùdi. Mupèèshèku mwoyi mule, nè mubidi tumatuma. Bènesàku baledi bèndè. Swàkù bwà cintu cimpè cyònsò cyŪdi mulayè aci, cìlwe pa mwànà mukesè wa balùme ewu. Maamù ngudi mumulàmbùle mu byanza byètù, bu bakùlù bàà èkèleeziyà. Nè mpindyewu twètù tudi tumulàmbula Kùdi. Mu Dìna dyà Yesù Kilistò, swàkù bwà Wèwè kubènesha mwànà ewu. Amen.

Nzambi àkubènèshè, wèwè mwànà mukesè Frank. Ngèèla meeji nè mmulenga wa dikèmà’s!

¹⁴ Mwà nè cyà kuyisambidila pàndi mu dilaabiibwa...?... Tudi nè ndambù wa mìshwâlà kaaba aka yà kusambidila, kàdi mbipiciibwe nè mèmè mwenze nàнку paanyimà pàà twètù bamanè kubanga kusambidila babèèdi, nè dilaabiibwa bwà mudimu dilwè. Dìbà adi’s tudi bafwànyine kwikala bimpè bu twètù mwà kuyisambidila dìbà adi.

¹⁵ Ndi nè disànkà bwà kumòna bààbúngì bàà ku balundà bàànyì kaaba aka. Ngèèla meeji nè ndi mmòna Mwanèètù Charlie Cox lwà paanyimà pààpa mu disangisha emu. Nè ndi kàbìdi mmòna Mwanèètù John O’Bannon, wa ku Louisville. Nè balundà bakwàbò bààbúngì, eku nè eku, bàndi—bàndi

njingulula's. Nè pa nàнку tudi nè disànkà dyà kwikalakù neenù kaaba aka, badisangishe pàmwè neetù mu dindà emu, bwà kusadila Mukalenge.

¹⁶ Mpindyewu tudi nè mwoyi wùzùka, paanyimà pàà katanci, bwà kubanga ditàbuluja kaaba aka bwà ndambù wa matùkù. Tudi munkaci mwà kusambila bwà bwalu abu. Ndi ndyùmvwa nè Nzambi Yèyè kàyì mutwàle ditàbuluja, anyi muditèeke pa mwoyi wètù to, dībà adi ditàbuluja adi ndiditàcisha dyètù twètù nkààyetù. Nè pashìishe twètù bindile, nè Yèyè mumvwe nè dībà dyākànyì dyà ditàbuluja, dībà adi Yèyè ùdi ùtèeka aci pa mwoyi wètù, pashìishe tudyùmvwa bwà kwenza ditàbuluja adi.

¹⁷ Mulundà mukwàbò udi musòmbe kaaba aka ewu, tatwèndè nè mamwèndè wa Mwanèètù Wood, nè umwe wa ku balubuludi bèètù mu èkèleeziyà emu. Tudi nè disànkà dyà kwikalakù naabò mu dindà emu.

¹⁸ Nèнку mu dipweka dyà nè mùsèèsù, makèèlèlà awu, muntu kampàndà uvwa musòmbele münwemu mu cimenga emu, uvwa memene mwàna mukesè, wa mukàyàbàle, nè mvwa misangu yònsò ànu mumuswè, nèнку's n'nsongààlùmè mwìmpè. Nè mukàjàànyì ùvwa musòmbele pabwìpi naabò. Nè yèyè ùvwa mwenzè bu mwimbi wa misambu, nè mwimbi wa mìjiki. Nè ùvwa nè ciibidilu cyà kusòmbela lwà kwàka nè ùtuuta dikàsà dyèndè panshi, mwàse cifulu cinène cyà cowboy ku mutù, nè wimba cisanji cyà mìjiki. Kàdi ùvwa ùkwàta mudimu ku WPA. Kàdi dīngà ditùkù cintu kampàndà kwenzekaci, citù misangu yònsò ànu cimvulwija, anyi cilama mu meeji àànyì's we, èyowà, kukaadi ntàntà mule. Kacya kacitukù cyànji kuumuka to. Ùvwa nè bàna bakesè bààbūngi; nè mukàji mulenga kumòna. Bàvwa bapèlè ànu bèètù bàà balàka pa mabwe aba, ànu mutùdi twètù bònsò aba emu.

¹⁹ Ke mèmè kumòna, mwimàne pa cibàndilu, mwèle mulongo, mwindile bwà shekè wa WPA kulwayè. Mutwàdidyanganyi wa mikàndà mifundilangana kulwayè wènda ùbànda nè mùsèèsù. Bàvwa nè disànkà dyàbūngi. Ditùkù dyàkalondà divwa m'Paasàkà. Bàvwa nè cyà kupeta ndambù wa mbòmbò yà Paasàkà anyi cintu kampàndà, pàvwa shekè wa papa ùfika. Nèнку pààkalwa mutwàdidyanganyi wa mikàndà mifundilangana awu, kàvwa nè shekè wa papa to. Nudi numòna mmwènekeli wa dyediibwa dyà mâyì ku makàsà awu kwìsù kwà bàna bakesè abu, nè divwa misangu yònsò ànu dindamàte, dyediibwa dyà mâyì ku makàsà dyà dikèma.

²⁰ Mèmè kuupanga kumòna muntu awu, kùkaadi bidimu. Kàdi makèèlèlà awu, ngènda mpweka nè mùsèèsù, pàmvwà. . . Mukàjàànyì nè mèmè tuvwa twenda tupàtuka mu makàjiinyi à byàkudyà, anyi mu Quaker Maid mu ville mwàmwa, nganyì ùmvwà mutuutàkèene nendè, cimònààmèèsù, piikalàye ní kí n'yèyè awu's? Nèнку cimwè cyà ku bintu byà kumpàlà bìvwàye

muswè kungambila ncyà nè, yéyè ùvwà mulwè mwena Kilistò. Kàvwa kàbidi ùnwà maalà to kùkaavwa bidimu. Nènku ndi nè disànkà dyà kwikalakù neebè, Mukalenge Logston, musòmbe pa nkwasà wa kumpàlà ewu, mu èkèleeziyà emu, mu dindà emu. Yéyè's ncidimba cyà èkèleeziyà wa Mwanèètù Junior Cash ku Charlestown, mu Indiana, mwanèètù mulenga be. Mbímpè be bwà kwikala mwena Kilistò kutàmba mùdibi kuntu kwàka mu maalù à pa buloba, kî mmwòmò anyi? Mpindyewu, ndi ngèèla meejì nè ùdi wimba misambu mu ndongamu, nè wimba mijiki yèndè, bwà butùmbì bwà Mukalenge. Ànu cikwàbò cileejì cyà bucìmunyi cyà ngàsà udi ukèmesha wa Nzambi.

²¹ Udikù ànu mwà kujuukila kuulu anyi, Mukalenge Logston? Ncyèna... Muntu ewu ùvwà musangu kampàndà mukwàciki wa maalà. Umwe wa ku bimbi bàà dipòkò bàà misambu yà bikàsa, nudi bamanyè's, bindaala nè bikwàbò. Mpindyewu byònsò mbikùdimuna bwà Bukalenge bwà Nzambi, nè nyéyè ewu mwab'ewu, wàmba nè: "Twasàkidila, bwà bwalu abu, Mukalenge." Kaa, pàvwà...

²² Mwà ndondela Mukalenge Wood, makèèlèlè awu. Mémè nè: "Panùdi wèwè nè maman, nufika ku luseke lukwàbò lwàlwa nè nupeta nzùbu wenù awu, nè mu dindà kampàndà panwikalà nè disànkà dyà menemene, nè lwà kwìnshì dishiyà dyà tukùnà atu, nè mu lupòngò kampàndà, mwaba kampàndà, mùdi kazùbù kakesè kampàndà kiibakamù, pangààpàtukà mu lutanda, nè mpàtuka kuntwaku nè ngùmana mu lutanda, nengeelè lubilà mu mpòngò mwònsò amu nè:

Ngàsà udi ukèmesha! dìyì dipòle kaayi's,
Dyàkasùngila mukèngeledi wa luse bu mémè
kùnù's!
Musangu kampàndà mvwa mujìmine, kàdi
mpindyewu ngàpetèki,
Mvwa mpofo, kàdi mpindyewu nkààdi mmòna.

²³ Mémè kwambila Mukalenge Wood, mémè nè: "Èè, tuutàku maman cyanza pa dikaaya, wamba nè: 'Nzambi àtumbè! Mwanèètù mununu Branham mmufikè. Nyéyè wàwa, kwìnshì kwàka mu kazùbù kèndè kakesè aku.'" Bu mémè mwà kufikaKù, neciikalè ku ngàsà udi ukèmesha wa Mukalenge Yesù.

²⁴ Mpindyewu tudikù mwà kwinyikakù mitù yètù bwà katanci kakesè cyanààna kumpàlà kwà kubuulula Dìyì.

²⁵ Mukalenge tudi cintu kampàndà bu mùdi musùmbà wà bàna bakesè. Tudi nè mmwènekèlù yètù yà buntu, nènku, twètù, ngiikàdìlù yètù yà dyela dyà mapikù, bwobùmwe bwètù pàmwe. Mpindyewu tudi tulwa ku citùpà citàmbe cijila cyà disangisha kanà dyònsò edi, bwà kubala Dìyì dyà Nzambi udi nè mwoyi didì kadiyì mwà kupangila adi. Ndi mwà kulòmba, Mukalenge, bwà Wèwè kwakula nè Dìyì dyònsò. Swàkukù bwà dipàtuke nè ditùkinè mu myoyi yà bantu, nè ditwalè dinowa bwà cyònsò

cìvwaDi dilongolwela aci. Swákù bwà Nyumà Mwímpè munène awu àlwe munkaci mwètù mpindyewu, nè àngatè Mèyi ikalà mwà kubadiibwa aa, nè àtwabànyìneWù, ku ciibúngì, mutùdì naawù dijinga amu. Bwalu tudi tulòmba nùnkù mu Dìná dyà Yesù nè bwà bwalu Bwèndè. Amen.

²⁶ Mu Musambu wa 80, ndi njinga kubala citùpà.

Mpèèshè macì, Wèwè Mulami wa mìkòòkò wa Izalèlèlè, wèwè ùdì ulombola Yòzefù bu cisùmbù cyà mìkòòkò; wèwè...udi musòmbèle munkaci mwà bakèlùbà, ùkenkè.

Kumpàlà kwà Efàlàyimà... Benyàmìnà nè Maanàsè bindululà dikàndà dyèbè, nè lwàkù ùtùsùngilè.

Twalùje kàbìdì, Éyi Nzambì, ...kenkèshà mpàla webè; nènku netùsùngidiibwè.

Éyi MUKALENGE Nzambì wa bilwilu, too nè dìbà kaayi diwàkwàcìlà masambila à cisàmbà cyèbè ciiji?

Ngwèwè awu ubàdùsha dyàmpà dyà binsònji; nè ubànwìsha binsònji mu cipiminu cinène.

Ngwèwè awu utùvwija cyena bwalu cyà matàndu kùdì mwena mutumba neetù: nè beena lukunà bèètù bàtùseka munkaci mwàbò.

Twalùje kàbìdì, Éyi Nzambì wa bilwilu, ...kenkèshà mpàla webè; nènku netùsùngidiibwè.

Wèwè udi mupatule mwonji wà mvinyò mu Èjiipitu: udi mwipate bampàngaanù, nè muwùkùne.

²⁷ Cyena-bwalu cyànyì mu dindà emu, bu Mukalenge mwà kucyànyisha, bwà katançi kakesè cyanààna, neciikàle pa: *Kukùna Mwonji Wà Mvinyò Nè Mwaba Wà KuWùkùnyina.*

²⁸ Mbyà bikèmesha mùdì Nzambì, mu myaba yàbúngì, ùleeja bantu Bèndè mu mishindù mishiilèshìilàngàne. Ànu àbìdì àdì panshì aa tuvwa twakula mwaba wùvwàYe mutùleeje bu mukankù, nè Yèyè bu Mukanku Yèyè mwine, nè twètù tudi twànà Twèndè twà mikanku. Nènku ndi nè dyeyemena dyà nè bintu byònsò nebyènzeke mu mùshindù mujaalàme. Musangu mushààle wùmvwà mwakule pa cyòcì aci, mvwa mupetè mukàndà mumfùndila mùdì... Cimenga cinène aci, bààbúngì bàà kunùdì mbamanyè mwaba wùvwàci, mu Ohio, nsangilu wa bambi wàkadisangisha pàmwè nè kupiisha masangisha àànyì bwalu ndi ngiitabuuja nè Nzambì ùtu mubiikile muntu ku Mwoyi wà Cyendèlèlèlè kumpàlà kwà difùkà dyà dyulu nè buloba. Nènku ku dyànyì diitabuuja, piikalàbì nè Nzambì ùdì Nzambì, kacya ní ùvwakù Nzambì, Yèyè ùcidi ànu Nzambì, nè ùvwà misangu yònsò ànu Nzambì. Yèyè kàyì mummanyè kumpàlà kwà dyulu nè buloba kwikalàbiku to, dìbà adi Yèyè kí n'Nzambì to.

29 Bààbúngì bàà kunùdì bàdì munkaci mwà kubala mwaba ewu mu císalu cinène cyà mbilu, nè bikwàbò, pa mmwènenu wa ndongelu wa dyumvwa. Nè bimwè byà ku byòbì abi bìdì, mu bushùwà bwà bwalu, byàlukila bwà kulwisha mudimu wànyì wà bwambi. Kàdì, pawikalàku mulonge anyì mupete mùshindù nànsha ùmwè wà dilonga dyà maalu mafwikakaja, maalu makwàtakaja nè: “cintu kampàndà cìdì cìmwèka bu nè ncyòci, kàdì kaciyì cyòci to.”

30 Kàdì mu Mifundu, tudi tusangana nè Yambèlè nè Yanè bààkakàndameena Mòsà mu kwamba kwenza kwà cintu cìmwècìmwè cyàkenzàbo aci, mu kwela kwà dikombo panshì nè kwandamukadì nyòka. Mòsà wàkabìikila bipùpù. Nè bàvwa mwà kubìikila bipùpù, bòbò pààbò, kàdì kabàvwa mwà kuumusha bipùpù to. Kabàvwa mwà kwondopa to, bwalu Nzambi ke mwondopi umwèpelè. Kàdì bàvwa mwà kufikisha bipùpù ku dilwa, pashìishe Mòsà kubyùmushayè. Pashìishe diteetangana dyà makàndà dyà ndekeelu kulwadì, pàvwà Mòsà mwenzè ànu mùvwà Nzambi mumwambile bwà kwenza amu.

31 Nènku ndi mumanyè nè, byònsò bìdiku, pa buloba leelù ewu ebi, nebikafikè ndekeelu wa byònsò ku diteetangana dinène dyà makàndà dīngà ditùkù. Bwalu, Bible mmwàmbè nè: “Ànu mùvwà Yanè nè Yambèlè bakàndàmèène Mòsà amu, ke mwikalà bantu bàà meeji moonèke, pa bìdì bìtàngila Diitabuuja, mwà kukàndameena mu matùkù à ndekeelu, kàdì dikùtakana dyàbò nedìmwèneshiibwe.” Nciprofètà cìdì nè cyà kuula, nè nudi mwà kumòna nseke yònsò yìbìdì yìjuuka mpindyewu.

32 Kàdì Mòsà wàkenza ànu menemene cyàkamwambilà Nzambi bwà kwenza. Wàkeela dikombo adi panshì nè kwandamukadì nyòka. Ke beena mikendi aba kupàtùkabò nè kwelabò makombo àbò panshì nè kwandamukawù nyòka. Mòsà ùkaavwa ku ndekeelu kwà lungènyì lwèndè, nè ku ndekeelu kwà dikàndà dyèndè.

33 Kàdì mwómò amu ke mùdì Nzambi muswè kutùfikisha, ànu ku ndekeelu kwà njila wetù, dībà adi Yèyè kubwelamù. Bìdì ànu mùyaakwenzaYè. Pàmwāpa udi usaama bikolè, mu dīndà emu, mu mùshindù wà nè ngàngàbukà wàmba nè kwèna mwà kwikala nè mwoyi to. Muntu munkaci mwà kutùkina mu mâyì nèàkwatè ku bisoosà. Ke mùshindù awu patùdì tuteeta bwà kupeta... Byònsò bitùdì mwà kukwàta naabì mudimu, twètù biinè, mu mùshindù wà buntu, netùbyenzè. Kàdì pàkaadibì bikafika ku nè kakùcyèna dikwàbò ditèkemena to, aba bàdì kabàyi bìitabuuja dyondopa dyà kùdì Nzambi nebìitabuuje ànu dībà adi mene. Ke ditèkemena dyàbò dīmwpelè ndyòdì adi.

34 Nènku Mòsà ùkaavwa mushiikile, pashìishe ke Nzambi kubwela nè kwenza nè nyòka wèndè awu àdyè nyòka wa muntu mukwàbò awu. Pashìishe nyòka wèndè kàcivwakù kàbìdì to.

³⁵ Mpindyewu, mu mmwènenu mutàmbe cyumvwilu, nè mu maalu mafwikakaja, nè beena lubùku bònsò, ngǎnji ànu, kumpàlà kwà mèmè kubanga cyena-bwalu cyànyì, nnùjaalàmijè nwènu biinè mu cyôci eci, ku dikwàcisha dyà Nzambi, mèmè nè mûshindù, dyabùlù ùdi mwà kwenza nè bintu bimwenekè bijaalàme, kàdi misangu yònsò bitu ànu bijaadikiibwa nè kî mbijaalàme to. Mpindyewu, kacya kabàtùkù banji kukùmbana mwà kukwàta nànsha umwe wa ku nyumà yìdì yìmwènèka eyi fòtò to, bwalu ncyà bushùwà nè yôyi kayènamù to.

³⁶ Kàdi pààkalwà dībà bwà Nzambi kujaadikila maalu à mamanya nè, Ûvwa Nzambi, wàkanyisha bwà kukwàtabò fòtò. Cidi cishààla kashidi. Mukenkeci wàkamba nè: “Bukènkè mbutuute lumwènù lwà tulòndò. Bukènkè bùvwa mwaba awu mu bushùwà bwà bwalu. Kacivwa cintu cyà mu meeji to.” Pa nànkù, nudi numòna’s, cidi Nzambi wènza cidi cishààla kashidi.

³⁷ Nyòka wa Mòsà wàkasùkumina nyòka wa bakwàbò abu. Nènku ùvwa mwà kumwambula mu cyanza cyèndè, kàdi nyòka wabò ùvwa munda mwà dikombo adi. Cidi dyabùlù wènza mbwalu bufwikakaja. Cidi Nzambi wènza ncyà bushùwà. Ki bwà cinyi, ndi muswè bwà eci cipwekè too nè mu ndòndò mu myoyi. Pàdi Nzambi ùsùngila muntu, yèyè mmusùngidiibwe. Kùditàcishi bwà dyalukila paanyimà nànsha; kwèna mwà kwalukila to. Cidi Nzambi wènza ncyà Cyendèlèlèlè. Dyabùlù ùdi mwà kukusalula nè kukufikisha ku diitabuuja nè udi musùngidiibwe. Kàdi pàdi Nzambi ùkusùngila bulelèlè, udi naaci mu ntàntà yònsò udikù kashidi awu, bwalu udi nè Mwoyi wà Cyendèlèlèlè. Yesù ngwakamba nànkù’s.

³⁸ “Ewu udi utèeleja Méyì Àànyì, nè wìtabuuja Yèyè udi muNtùme awu ùdi nè Mwoyi wà Cyendèlèlèlè, nè yèyè kààdyàkupìcilakù ku Cilumbulwidi to, kàdi wàmányì kuumuka ku lufù muyè ku Mwoyi.” Aci’s ncyà Cyendèlèlèlè ànu mùdì Nzambi Yèyè mwinè amu, bwalu n’Diyì Dyèndè.

³⁹ Nzambi udi Nzambi umwèpelè. Yèyè kèna mwà kuDisambakaja nè bikwàbò bintu to, Yèyè ngwa kàyi ùpanduludiibwa nànsha. Nzambi ùdi Nzambi. Diyì ditùma dyà kumpàlà, didi nè: “Kwikadi nè nzambi mikwàbò kumpàlà Kwànyì nànsha.”

⁴⁰ Pa nànkù kwèna mwà kusambakaja maanyì nè mâyi nè kwenza bwà kukùmbananganabi to. Cidi nè cyà kwikala anyì mâyi anyì maanyì. Nè Nzambi ùcidi ànu Nzambi umweumwe awu. Tudi nè ntèdeleelu udi usambakaja wàmba nè: “Nzambi wàkadi, musangu kampàndà wàkenza *cikampàndà*, kàdi kèna ùcyenza leelù ewu to,” dībà adi tudi tuteeta bwà kusambakaja maanyì nè mâyi pàmwe. Bwalu, Yèyè. . .

⁴¹ Mufùndù mmwàmbè nè: “Yèyè ùdi umwèumwè awu makèlèlèlè, leelù, too nè kashidi.” Kadyàkusambakanakù nè bupidyà to; diitabuuja’s.

⁴² Tudi nè diitabuuja mu Nzambi. Ndyà Cyendèlèlè. Bupidyà bùtu ànukù misangu yònsò, kacya ku budimi bwà Edènà. Nzambi ùtu misangu yònsò ànu muswè bwà bantu Bèndè kwitabuujabò cyôci eci. Ûvwa muswè bwà kwikalabò nè dyeyemena, nè bwà—bwà kuDileeja munkaci mwà bantu Bèndè. Nzambi ùdi Nyumà.

⁴³ Mu Yone Munsantu nshapità wa 15, mvensà 1, Yesù wákamba nè: “Mémè ndi Mwonji wà mvinyò; nwénù nudi matàmbà.” Mpindyewu, ditàmbà nè Mwonji wà mvinyò mbilamàkàne pàmwè. Nè Nzambi ùtu misangu yònsò ànu ùteeta bwà kupeta bantu bàvwàYe mwà kusòmbelamù, bwà Wàmòna mwà kuleeja butumbi Bwèndè munkaci mwà bantu Bèndè.

⁴⁴ Pa nàнку tudi tubala kaaba aka nè Davidi wàkeela lubilà lukolè, nè kwamba nè: “Éyì Mukalenge Nzambi, alùkilaaku cyàkàbidi kutùdi. Tudi benzè mpèkaatù nè bayè kule Neebè. Wèwè Udi musòmbèle pankaci pàa cyoshelu nè mukèlùbà, ùkenkè cyàkàbidi.” Bwalu yèyè ùvwa mumanyè nè musangu kampàndà Yèyè ùvwa Nzambi munkaci mwàbò, nè Davidi ùvwa mumanyè nè Yèyè ùcìvwa ànu Nzambi. Bantu bàvwa batàpùlùke Nèndè. Nzambi kàcìvwa kàbidi ùkenka to. Kabivwa nè mbwalu Yèyè kàvwa mwà kukenka to. Mbwalu bantu mbadikàngile kule nè luse Lwèndè lujaalàme, ku mpèkaatù wabò. Dìbà adi Davidi ùdi ùya ku cyena-bwalu cyètù. Misambu 80.7.

⁴⁵ Yèyè nè: “Wèwè kujoomona mwonji wà mvinyò, mu Èjiipitù, nè wèwè kuwùpatula nè kuwùkùna mu mwaba mwímpè.” Awu’s ùvwa ny’Izàlèlèlè, cisàmbà cyà Nzambi cìvwa mu Èjiipitù aci. Bàvwa mwonji wà mvinyò mwímpè. Bàvwa basungula bàà Nzambi. Kàdi mwonji wà mvinyò mwímpè wòwò kawùyi mutèeka mu buloba bwímpè to, kawàkukwàma mamuma mímpè nànsha. Mbilondèshile ku mwaba wùdi mwonji wà mvinyò mukùnyìbwe, ke wàleeja bipeta byà dinowa. Pa nàнку, Nzambi wákambula Izàlèlèlè, mu buloba bwatùke.

⁴⁶ Ncintu kampàndà bu mùdi leelù ewu. Mu ditùnga emu, tudi nè beena kwitabuuja banène bààbùngì nè bàà maalu mímpè, kàdi’s mbasambàkàne mu èkèleeziyà yònsò yà cyena-màngumba eyi. Mbafùmìne mu mòngumba mashiilèshìilàngàne nè myaba mishiilèshìilàngàne yà mu nsòmbelu. Ke bwà cinyi, mu mudimu wànyì wà bwambi, ncitukù mwànji kuteeta to, musangu nànsha wùmwè, bwà kudyombola muntu kampàndà anyi dìngumba kampàndà to, bwalu, mu ònsò awu, mùdi bantu bímpè. Mbantu babiikila nè basungula bàà Nzambi.

⁴⁷ Wèwè uvwakù mufwànyine kwikala mupìishe Izàlèlèlè pàvwàye mu Èjiipitù apu anyi? Bòbò’s bààkapàtuka ànu mu dikàsà dibì. Nè mpèkaatù yàbò yàkabàtàpulula nè—nè Nzambi, nè bàvwa bakùnyìbwe mu Èjiipitù.

48 Mùshindù awu ke wùdi bantu bààbùngì, mu maèkèleeziyà leelù ewu, bantu bîmpè bakùna ànu mu mwaba mubi. Mpindyewu mwena kwitabuuja mulelèlè yêyè mutwàla kùdì Kilistò, kàdi mukùnyìibwe mu dîngumba kampàndà dinène didì kadiyì dîitabuuja bishimà nè bimanyinu nè maalù à kukèma byà Mukalenge, muntu awu ùdi mwà kwikala mwena Kilistò mushùwashùwàle, nè mwena Kàtòlikè, Baptiste, Presbytérien, Ntèmu wa Yèhowàh, cintu kampàndà cikwàbò. Mu èkèleeziyà awu, Mwonji wà mvinyò mushùwashùwàle wà Nzambi, kàdi twitabàayi wa cyena màngumba ùdi ùkòsa Mwoyi wà Mwonji wà mvinyò awu. Kawèna mwà kukwàma mamuma Àwù to.

49 Nènku, pa ciibidilu, mamuma àudi upòòla ku mwonji wà mvinyò wùdi mushawùke anyì kawùyi mu buloba bwîmpè mmamuma mabi. Neàpàtuke bu pomme, kàdi neànyanè nè àdiikè kùdì bishì. Àdi àshàala à bîshi byònsò bibunda.

50 Mwonji wà mvinyò mwîmpè nè mubidi tumatuma kawèna nànsha wùkèngela bwà kuwùpwidijila manga to. Ùdi nè bukolè bwà mubidi bukùmbàne bwà kwipata beena lukunà bàwù bònsò.

51 Ke mùdibi kàbìdì nè mwena Kilistò mulediibwe cyàkàbìdì. Kabyèna bikukèngela bwà kwikala kubàpwidijila manga dîbà dyònsò nànsha, nè kubàtuuta byanza pa makaaya to. Bàdi nè mubidi tumatuma mukùmbàne wà mu nyumà bwà kutàpuluka nè cilèndwishi cyònsò cyà pa buloba. Bàdi nè mwoyi ku cidìishì cilelèlè.

52 Mucì misangu mikwàbò, bwà...anyì cikùnyìibwa cìdì mu myaba yà cipèèlè, kàdi kaciyì cipeta citaleela cikùmbàne bwà kucikwàcisha, necikwame mamuma makesè manyàne, nè kabyàkumwèka bu mamuma àvwà nè cyà kupàtukila ku mwonji wà mvinyò awu to.

53 Mwanèètù wa balùme, mwanèètù wa bakàjì, ke bwalu bùdiku kùdì maèkèleeziyà leelù ewu abu. Ngènzàmpèkààtù ùdi ùbwela, paanyimà, pàmwàpa, ùya kumbèlu mutwishìibwe, ùya ùkabala Bible wendè, nè ùya ku èkèleeziyà. Pamutù pàa kupeta bimuma binènè byà pommes anyì byà tumuma twà mvinyò, Mwoyi wà Mukalenge Yesù munkaci mwà kuvulangana mu Èkèleeziyà, ùdi ùsangana tuumeeji tucimbàkàne tukesè, tunyàne, tudya kùdì misàndà, twà cyena-màngumba. “Twètù ba-Baptistes, tudi naaci. Bòbò kabèèna naaci bwalu to. Twètù ba-Méthodistes, tudi naaci.” Mabòkò à Nzambi mmatwè ku mbù nè ku mbù mukwàbò, nè ku mwelelu nè ku mwelelu mukwàbò wa màyi, àdi mwà kusùngila too nè ku ndekeelu. Kàdi aci’s ke citùdi tusangana mu myaba yitùyaayà.

54 Bìdi ànu bu mwàkambà Davidì, kàbìdì, mu Misambu 1. Wàkamba nè: “Wa disànka mmuntu wíkala kàyì mwà kудisanga nè baseki nè bantu bàdì kabàyi bàneemeka Nzambi aba, kàyì muswikàkàne naabò to, kàyì ùsòmbela mu cisòmbèdi cyàbò to. Nudi bamanyè’s, baseki bàdì bàmba nè: ‘Matùkù à bishimà

àkaadi mamanè kupita. Nè dibàtiiza dyà Nyumà Mwímpè didi ànu diitabuuja dyà budingibudingi.' Wa dyàkalenga mmuntu wíkala kàyi mwà kwenza nànkú. Wa dyàkalenga mmuntu wíkala mwà kuumuka ku cintu bu nànkú. Kí mbaswè kusambakaja abi to. Nè kwèna mwà kusambakaja bintu abi to. Wa dyàkalenga mmuntu wíkala kàyi mwà kudisangisha nè kubwela mu cìmwè cyà ku bintu bìdì bìvila Bukolè bwà Mukalenge abi."

⁵⁵ Bible mmwâmbè nè: "Pàtukàayi munkaci mwà bàà nànkú awu, bwalu ditùkù nedilwe diikalàbo bapapè mitù, badibàndishi, banangi bàà bisànkasanka kutàmba kwikala banangi bàà Nzambi; biikàle nè cìmwènekeli cyà difwàna dyà Nzambi, kàdi bàvila Bukolè bwàdi: tàpulukàayi nè bàà bwena abu."

⁵⁶ "Wa disànkà mmuntu wíkala kàyi mwà kudisangisha nè baseki aba, bèlulwila, bàbìikila Èkèleeziyà mulelèlè nè: 'musumbà wà bakoleshi bàà maalu.' Yèyè neikalè bu mucì wùdì mukùna ku kâlà kwà misùlù yà mâyi." Nzambi mmumutèèke mu mwaba wà disungula. "Mamuma èndè kâkufùbidila to. Yèyè nèapàtule mabèji èndè nè mamuma mu muvù." Tàngilàayi mwàkapàtula Davidi myâkù ayi's. "Muntu ewu mmubèneshiibwe. Neikalè mukùnyiiibwe," kî ng'ànu mutèèka cyanaàna to. Nudi bamanyè's, mèmè ntu muswè kumòna cintu kampàndà cikùnyiiibwe.

⁵⁷ Mpindyewu, Izalèlèlè, mu Èjiipitù, kàvwa mukùnyiiibwe nànsa. Bàvwa batèèkiibwe ànu cyanaàna. Kacivwa buloba bwàbò bwà ku cibangidilu to. Kàdi muntu udi mwena Kilistò, udi ushindamijila kwèndè kwà Cyendèlèlèlè kùyaayàye pa twitabàayi kampàndà wà cyena-màngumba, kèna mu mwaba wèndè mujaalàme to. Úvwa mulediibwe bwà kwikala mudishikàmìne, nè mwànà wa Nzambi, bwà kukuukwila Nzambi. Kàdi yèyè ùdi mwînshì mwà twitabàayi kampàndà, kèna mwà kukwàma mamuma èndè to, kàdi pàabi's cintu kampàndà munda mwèndè cijinga kucyènza.

⁵⁸ "Yèyè neikalè bu mucì wùdì mukùna ku kâlà kwà misùlù yà mâyi." Misùlù, ku búngi; mâyi, ku búmwè. Misùlù yàbúngi yibwela mu kajila kàmwè. Mu ngaakwilu mukwàbò, yèyè neikalè bu muntu mu Mifundu, wùdì witabuuja Dîyi dyònsò dyà Nzambi, mùdì Bukolè nè mapà citèemà à Nyumà mwà kutùnkumukila, mu Nzambi umwèpelè, mu buumùntù bwèndè bwà munda menemene.

⁵⁹ Bantu kabàtu biitabuuja dyela dyà mbilà to, bwalu bùdiku mbwà nè, kabèèna nè disànkà dyà nyumà to, nè masànkà à mu mâyi à Mwoyi àdi mwà kutùnkumukilamù. Ke cidi citàmbe kwikala lutàtu mu Branham Tabernacle ncyôci aci, bwalu bwà bupidyà, diditácisha dyà maalu à pa buloba mbiswike bantu mu mùshindù wà nè kabèèna mwà kupàtula dikola dyà mu nyumà nànsa.

⁶⁰ Ke lutàtù lùdiku nè ditùnga dyètù ndwôlò alu. Ke lutàtù lùdi naalù èkèleeziyà yètù ndwôlò alu. Kabèèna nè disànkà to. Nè disànkà dyà Mukalenge ndimanà kuya. Bu mwàkafùndiibwabi musangu kampàndà mu Mifùndu, mwàkù wà cyena Ebèlù wà Ikàbòdè, wùdì wùmvwija nè: “Bwikadi bwà Mukalenge mbumanè kuya.” Aci’s cidi pa èkèleeziyà yètù, bwalu tudi buumùke ku cishimikidi cyà ku cibangidilu, nè baditèèke twètù biinè mu twitabàayi nè òngumba, nè baanyishile maalù à pa buloba bwà kuumishawù dilabula dyètù nè Nzambi.

⁶¹ Kaa, ndàayi naanyi ku Arizona. Lekèlaayi nye neenù mu bipèèlà, muntù mbànda mpweka bidimu búngibi. Bintu byònsò mu cipèèlà bìdi nè musongolo pambidi. Dìna kaacikùnyìibwà kakesè kònsò kaùdi ulengakù, kùseemenyikù pabwìpi naakù to, nekàkutwè. Kàdi dîbà dyònsò ànu nè misongolo kacya mikenye ku mènù, midilongòlòle bwà kutwà cintu cyònsò cidi ciseemena pabwìpi naakù aci. Mbwalu kaayi ebu’s? Ncinyi cidi cìcìvwije musongolo? Mbwalu kacayèna nè mâyì to. Ke cidi cìcìyùmisha. Musongolo awu’s ndibèji, didivunge. Bwà dipangila dyà mâyì, didi dilwà musongolo.

⁶² Ke mùdibi kàbidi nè èkèleeziyà, leelù ewu nè, pàdi èkèleeziyà ùmuka ku Mpokolo wa Mwoyi, pàdiye ùmuka kule nè masànkà à lupàndu, pàdiye ùya kule nè Mukalenge Nzambi, dîbà adi muntu awu ùdi ùlwa musongolo, misangu yònsò ùjandula ànu bilèmà, munkaci mwà kutwàngana, paùdi ànu useemena nè: “Mémè ndi Presbytérien. Ndi Méthodiste. Ndi *kampàndà*. Kùngambidiku bwà cintàkanyì aci to.” Musongolo’s! Kacayèna nè mamuma to.

⁶³ Angàtà mucì wùmwèwùmwè awu, ntùlu, nè ùwùtèèke mu buloba mu nkòngo mikesè, mùdi mâyì àbùngì amu, nè musongolo awu newùvùngulukè nè newùlwe dibèji dinèfùke, dikwàma mamuma.

⁶⁴ Mbwalu kaayi ebu nè èkèleeziyà leelù ewu’s? Ùkaadi mudibweje mu òngumba, didi ditèèke twitabàayi yà cyena-màngumba nè ùdiswika, kàyi disànkà, ànu dimyamina dyà mâyì ku misangu, dyà kaaditàbuluja kakesè bwà kucilaminakù. Cidi cidikèngelà, nkupàtuka munkaci mwà baseki nè beena bupidyà, nè kukùnyiibwa ku kâlà kwà misùlù yà mâyì.

Bwalu kùdi Mpokolo mùle tètè nè Mashi,
Makòka mu mujilu wà Èmanùwèlè,
Mùdi bangènzàmpèkààtù, (beena bupidyà)
biinyija mwînshi mwà nkwaka awu,
Bàjimija dikeji dyàbò dyònsò dyà dipiilà.

⁶⁵ “Muci,” mwàkambà Davidi, “wùdì mukùna ku kâlà kwà misùlù yà mâyì awu.” Kaa! Nzambi kèna mwà kutùnkumukila mu ntùlu to.

⁶⁶ Mpindyewu, mâyì àdi àleeja mwoyi. Tudi bamanyè nè Mòsà, mu cipèèlà, wàkatuuta Lubwebwe, nè lwàkapàtwila cisàmbà cìvwà cyàmba kufwà mâyì à mwoyi. Nè Yesù wàkamba

nè: “Ànu mwàkatuutà Mòsà lubwebwe mu cipèèlà amu, ke mwikalà kàbìdì Mwànà wa muntu nè cyà kubàndishiibwa,” nè Wàkatuuciibwa.

67 Mwoyi wùdi mu kabùlù kàà mashi. Nè Mwoyi awu kawèna mwà kupàtuka pàdi Kabùlù kàà Mashi aku kakàyi kataayisha nè kabòza to.

68 Pààkapàtulà Nzambì Izàlèèlà, Wàkabàpèèsha diteeta, bu ditùngà. Wàkabàjoomona mu Èjiipitù, munkaci mwà beena bupidyà. Nè kubàtwàla mu bukùbì Bwèndè bwà dinanga, pa mapwàpwà à mukanku, mukankù munène awu, Mòsà, wàkabàlombola ku mwaba nè ku mwaba, ùteeta bwà kubàfikisha mu ngiikàdìlù, bwà kusabukabò dyàmwàmwà. Munda mwà bidimu makàmi ànaayi Yèyè kubalombola nè kubàdiisha mu cipèèlà. Nènku Yèyè kudiiisha buloba, buloba bwimpè, buloba busungula. Nè Wàkaleeja cishimà Cyèndè, bimanyinu nè maalu à kukèma, munda mwà bidimu makùmi ànaayi mu cipèèlà. Yèyè wàkenza bishimà nè bimanyinu, ku mupròfetà ewu, bwà kuleeja nè Yèyè ùvwa Nzambì. Nganyì uvwa mwà kuumisha mbù pakuumusha Yèyè? Nganyì uvwa mwà kunyooka Èjiipitù pakuumusha Yèyè? Nganyì uvwa mwà kwela cyanza muulu pakuumusha Yèyè? Kàdi, munkaci mwà biine byònsò abi, Yèyè ùvwa Nzambì, nè WàkaDileeja Yèyè mwinè Nzambì. Ncyà bushùwà nè Yèyè ùvwa muswè bwà cisàmbà Cyèndè kwenzaci nànkù.

69 Pashìishe Yèyè wàkabolesha buloba bwà Pàlèstinà, nè mashi à mbùji nè à nkùngùlù yà ngombe, bimpàngà byà ngombe, nè mikòòkò. Kàdi bantu kabààkaswà kutwàla to. Kabìvwa bikùmbàne to, bwalu mwoyi wà cimpàngà cyà ngombe... Kabùlù kàà mashi aku nkazaajìibwe, nè mwoyi wà nyama kwalukilawù, kawùvwa mwà kukùmbanangana nè mwoyi wà muntu to.

70 Dìngà ditùkù, Nzambì wàkapàngadika nè Yèyè ùvwa muswè kusungila cisàmbà Cyèndè, Èkèleeziyà Wèndè mudyanjila kulongolola. Bìvwa bikèngela bwà Yèyè kucyèenza, Yèyè mwinè, bwalu Yèyè wàkadyànjila kucìlongolola kumpàlà kwà difùkà dyà dyulu nè buloba.

71 Muntu ùdi dipangila, nè ke mwikalàye misangu yònsò. Yèyè ùdi dipangila, ànu kwinè kwònsò aku, nè yèyè neikalè misangu yònsò ànu dipangila.

72 Nzambì, mu didyànjila-kulongolola Dyèndè, mu meeji Èndè Sungasunga manène à kaàyi mikàlu awu, wàkalongolola ndongamu bwà kukùna Mwonji wà mvinyò mulelèlà. Nè Yèyè wàkakùna pa buloba apa, Mwonji wà mvinyò, Mwonji wà mvinyò mwakàne awu; kî ndìngumba to, kî ng'èkèleeziyà to, kî ntwtàbààyi to, kàdi Muntu, Yèyè mwinè, muvwijìibwe mubidi. Nènku Yèyè wàkamwènesha ditalala Dyèndè, Bukolè Bwèndè, Mwanjèlò munène wa Nzambì awu. Yèhowàh munène

awu ùvwa Nendè. Nè munda Mwèndè mùvwa musòmbèlè kaabujimà kàà Bunzambi mu mùshindù wà mubidi. Kàdi bantu kabààkaMwìtabuuja to; nènku kubènga kuMwìtabuuja bwalu Yèyè kàvwa mwà kupetanganakù nè twìtabàayi wabò awu to.

⁷³ Ndekeelu wa byònsò, kuMulombolabò too nè ku Kàlvaryò, kwòkò aku Kabùlù kàà Mashi aku kàakazaajiibwa, kàà Mwànà wa musinga mukolè wa Nzambi, Mubidi wùvwa Yehowàh musòmbèlemù awu. Kwàkapàtuka Mwonji wà mvinyò, nè miji Yàwù mu Butùmbi, nè matàmbà Àwù pa buloba, bwà kupàtula Èkèleeziyà wa Nzambi udi nè mwoyi, uvwa mwà kuleeja patòòke dibìikà Dyèndè dyà ku lufù nè Bukolè Bwèndè. Mbalùme nè bakàji kaayi aba bàdi bafwànyine kuvila Èkèleeziyà awu, Mwonji wà mvinyò wa Nzambi udi nè mwoyi awu? Bwikadi bwà Mukalenge Yesù bùtù kabùyikù bupangila abu bwikale nè Èkèleeziyà Wèndè, bwà kwikala nè mwoyi, nè kuleeja patòòke matàmbà Èndè madyànjila kulongolola àkapetaYè kumpàlà kwà difùkà dyà dyulu nè buloba, nè wàkadìcipila ku bòbò aba nè Ùvwa mwà kubàbiisha ku lufù. Nènku Èkèleeziyà Wèndè leelù ewu, nè butùmbi bwà dibìikà Dyèndè dyà ku lufù busòmbèlè munda Mwèndè: “Mémè ndi Mwonji wà mvinyò, nwènù nudi matàmbà.” Musangu wònsò wùdì mwoyi wùtuuta, mashi àdi àdìpwìdijila kùdì cidimba cyònsò cyà mubidi. Musangu wònsò wùdì mwoyi wà lulamatu wà Nzambi wùtuuta, wùdì wùpuuyakeena mu Dìnà dyà Yesù Kìlistò, wùtangalakila Èkèleeziyà, “Cyònsò cinùdì nulòmba mu Dìnà Dyànyì aci, Mémè nèncyènzè. Ndi neenù misangu yònsò, too nè ku ndekeelu kwà buloba mene.”

⁷⁴ Kabyèna bikèmesha to pààkambà Peetèlò, mu Dìtùkù dyà Mpenta nè: “Nyingàlàlaayi, muntu nè muntu wa kunùdì, nùbatìijiibwè mu Dìnà dyà Yesù Kìlistò bwà dilekelediibwa dyà mpèkaatù yènù, nènku nenùjiibwè nè Mwoyi wà ku Mwonji wà mvinyò.” Nyumà Mwìmpè ùfila Dìnà Dyèndè, bwà nè twètù baswikàkàne Nendè, Yèyè mmuswikàkàne nè Nzambi, bwalu Yèyè ùvwa Muji nè Mùtòlòkò wà Nzambi.

⁷⁵ Wàkalwa pa buloba. “Buloba bwàkenjiibwa kùdìYe. Yèyè wàkalwa pa buloba; kàdi bàà pa buloba kabààkaMumanya to.”

⁷⁶ Nènku mpindyewu, leelù ewu, Yèyè, paanyimà pàà lufù Lwèndè, bwà kufila Kabùlù kàà Mashi, bwà kucibula, bwà nè ku Mashi à Yesù Kìlistò Èkèleeziyà wàmòna mwà kujidiibwa nè kutèèkiibwa mu bulongàme, bwà nè Nyumà Mwìmpè munène, udi Mwoyi wà Mvinyò awu, Mwoyi wà Cyèndèlèlèlè wà Mvinyò awu, bwà Nyumà Mwìmpè awu wàmòna mwà kupuuyakeena munda mwà cidimba cyònsò cyà Èkèleeziyà wa Nzambi udi nè mwoyi.

⁷⁷ Kabyèna bikèmesha to mùdìbo cisàmbà cyà pabwàcì nè cyà mùshindù. Kabyèna bikèmesha to mùdìbo bènza maalù à pabwàwù. Kabàcyèna kàbìdì nè maalù à pa buloba ebu to, bwalu

mbafwè nè bajiikiibwe mu Kilistò, nè babiishiibwe bwà mwoyi mupyamùpyà, bwà kwikala mamuma à ntwàdijilu à aba bàdi bàsànkà nè dibiiikà dyà ku lufù dyà mu nyumà, bwà Nyumà Mwímpè wàmòna mwà kupicila mu cidimba cyònsò, nè kuleeja butumbi bwà Nzambi patòoke, mwàkabùleeja Nzambi Èjiipitù pààkapàtulàYe Mwonji wà mvinyò awu.

⁷⁸ Mpindyewu, kùdi mwonji wà mvinyò wà mu cisuku. Bible ùdi wàkula bwà bwalu bwàwù mu Bakalenge Mwibìdi. Kàdi nuvwa bamòne, pààkapàtuka muyiishi ewu bwà kukùngwija nkùnde, wàkajoomona ku mwonji wà mvinyò wa cisuku. Mvinyò yà cisuku ayi yidi nè cyà kutòlokela pabwipi nè sèminère mwaba kampànda, bwalu cìvwa mmu cìlongelu cyà baprófeta. Ke kwambulayè dibòko dijimà dyùle tètè nè bilòwalowa. Kubyèlayè mu lwesu, nè kuteetayè bwà kubisambakaja nè musàbù mulelèlè, mushùwashùwàlè. Ke kwelabò lubilà nè: “Lufù lùdi mu lwesu.”

⁷⁹ Mwanèètù, kùdi mwonji wà mvinyò wà cisuku mutòloke, nè ùdi ùkolela lwà ku twitabàayi, òngumba. Kàdi pàdiwu wùpàtuka kuntwaku, ùdi ùkànga disànkà dyònsò dyà nyumà. Kàdi katanci aka anyi, mwonji wà mvinyò awu mmufwè.

⁸⁰ Kàdi Nzambi mmupàngàdike bwà nè mvinyò Wendè kàfù to. Pa nànkù Yèyè kuMujoomona mu twitabàayi ayi, nè kuMuuja nè Nyumà Mwímpè, nè kuMushikika panshi, mu Dîna dyà Yesù Kilistò. Mwaba awu Èkèleeziyà awu ùdi mwà kupuuyakana nè kwikala nè mwoyi, nè kusànkà, kuumvwa Bwikadi bwà Nzambi udi nè mwoyi, ùMutàngila wèndakana nè wènzà bintu byàkenzàYe pààkadiYe pa buloba apa abi.

⁸¹ Bwà cinyi? Matàmbà Èndè, dilamakana Dyèndè, muji Wèndè, cibangidilu Cyèndè, wàkadi Nzambi. Yèyè ùvwa Mwànà wa mùkòòkò mushipa kumpàlà kwà difùkà dyà dyulu nè buloba. Kumpàlà kwà kwikalakù dyulu nè buloba, Yèyè wàkadi nè Nzambi. Yèyè ùvwa Muji nè Mùtòlokò wà Davìdi, Mùtootò wà mu Dindà, Mbata wa mu Cibanda. Ke cyàkadiYe.

⁸² Miji Yèndè mmijìngila ku Nzambi, minyùngùlùkile Nkwasa wa butumbi, minyùngùlùkile Bukalenge bwà Nzambi. Miji Yèndè mmijìngilakù. Mwoyi Wèndè wàkatangalaka pa buloba. Nè Yèyè wàkafila Mwoyi Wèndè, bwà Wàmòna mwà kwalukila ku miji nè kupuuyakana kàbidi, bwà kupàtula matàmbà mu Mwonji wà mvinyò awu, cidi ciikàle Èkèleeziyà Wèndè munkaci mwà kuleeja bipeta bimwèbimwè byàkaleejaYe pàvwàYe pa buloba apa abi, bwà kuMuvwija umweumwe awu makèèlèlè, leelù, too nè kashidi.

⁸³ Éyi Èkèleeziyà wa Nzambi udi nè mwoyi, itàbùùjà eci, Bulelèlè! Ki Yèyè awu. Pàdi Nyumà mulelèlè wa Nzambi ùkwàta mudimu pa mwena kwitabuuja, cyònsò cidi Mufundu wàmba aci, yèyè neàtwe: “Amen.” Bwà cinyi? Nyumà Mwímpè wàkafunda Bible awu, ùdi munda mwèndè, ùpuuyakeena mu

mwoyi wèndè. Yêyè kèna ùcyùka udi musòmbe mwaba awu, anyi cidi ní nganyi mukwàbò wàmba to. Necìikalè misangu yònsò ànu cìpetangana nè Dîyî.

⁸⁴ Kùdi cyà cibì. Mbilòwalowa. Mbipòòlela ku mwonji wà mvinyò wa cisuku. Mmwonji munène wà mvinyò, wùbwikidija buloba bujimà, kàdi's mmufwè. Byàbùngi byàwù mbimwangelaja munkaci mwà bantu.

⁸⁵ Kàdi, vùlukaayi nè, “Bukula” bùdi bùcyàluja ku Mwoyi, bùcìjoomona nè bùcìshikamija ku kâlà kwà mwaba wà difwànà dyà Nzambi, wùdi mwikale Kilistò Yesù awu's. Cyònsò cidi Dîyî Dyèndè aci, Dìikalè “amen,” bwèbè wèwè. Pashìishe Nyumà wa Nzambi, dîbà adi, disàнка dyà nyumà neditùnkumukè ànu mùdi musùlù amu. “Yêyè's mmufwànyine kwikala bu muntu, mucì, wùdi mukùna ku kâlà kwà misùlù yà mâyi. Mabèji Èndè kaàkufùbidila to. Kààkusòmbe mu cisòmbedi cyà basekyanganyi anyi beena bupidyà to, anyi muntu udi kàyì ùneemeka Nzambi udi nè mwoyi bilondèshile maalu à pa buloba awu, kàdi yêyè neàkwamè mamuma mu muvù wàwù.” Mmamuma à mùshindù kaayi awu? Wèwè mukùnyìibwe mu Kilistò, neùkwamè mamuma à nyumà, mamuma à nyumà à Nyumà Mwimpè. Nyumà Mwimpè mmusòmbele munda mwèbè.

⁸⁶ Bàvwa bàakule bìmpè, kùdi mukàji wa ku ciinà cyà mâyi awu. Bwà kujikija, tudi bafwànyine kwamba nùku ewu, wàkamba nè... PààkaMumònàye, Úvwa nè mmwènekèlu ànu wa muntu wetù wa patupù ewu, kakùvwa cintu nànsha cimwè cyà cikòka ntèmà pa bwalu abu to, cìvwà cikòka ntèmà's wè, èyowà.

⁸⁷ Bwalu Mifundu mmyàmbe nè: “Kakwèna bulenga nànsha bùmwe butùvwà mwà kuMujingila to. Twakasokoka mpàlà yètù kùdiYe.”

⁸⁸ Nè bàdi bènza cintu cimwècimwè aci leelù ewu. Bòbò kabàyi bàtancila mu mamuma à nyumà à Nyumà to, bòbò kabàyi bàtancila ku bintu bìdi byà Nzambi to, Kilistò ncintu cibì kumòna bwàbò bòbò, “Musùmbà wà bansantu babùnguluki bàà mu malaba, musùmbà wà bantu bapàle bàdi kabàyi nè lungènyi mu lwòlò to.”

⁸⁹ Kàdi, bwà mwena kwitabuuja, ùdi ùCyùpukila. M'Mwoyi wà Cyendèlèlè. Cintu nànsha cimwè kacyèna mwà kutùtàpulula nè dinanga dyà Nzambi to. Nànsha lufù, anyi tunyinganyinga, anyi ciyòlè cyà nzala, anyi cintu nànsha cimwè kacyèna mwà kutùtàpulula to. Tudi bakùbìibwe Cyendèlèlè mu mabòkò Èndè. S'ke twètù abu, padiye ùpukila nkùrusè.

⁹⁰ Mukàji awu wàkamba, pàvwà... Yêyè wàkeela lukonko nè: “Udikù mwà kuNtwàdila mâyi à kunwà anyi?”

⁹¹ Yêyè nè: “Kàdi kacitù cilèlè bwà Wèwè ewu, muntu mulùme, mwena Yudà, bwà kwela mwena Sàmaalèyà, mèmè mwinè ewu, lukonko lwà mùshindù awu.”

Wakamba nè: “Nyingalalaayi, muntu nè muntu wa kunùdì, nè nùbatiiibwè mu Dîna dyà Yesù Kilistò, bwà dilekelediibwa dyà mpèkaatù yènù, nènku nenùpetè kupà kwà Nyumà Mwîmpè. Bwalu mulayi wùdì kunùdì, nè kùdì bânà bèènù balela, nè kùdì aba bàdì kule, mu búngì bwónsò bwàbìkilàbo kùdì Mukalenge Nzambì wetù abu.” Nè nwènù pèènù’s, nudi mu dibìikila adi. “Nyingalalaayi, nùbatiiibwè mu Dîna dyà Yesù Kilistò bwà dilekelediibwa dyà mpèkaatù wenù. Mulayi wùdì kunùdì.”

¹⁰³ Kaa, mwanèètù, Nyumà mulelèlè wa Nzambì neàpuuyakeenè pa Cyòci aci, wamba nè: “Aci m’Bulelèlè.” Tàngilàayi bilòwalowa nè mwonji wà mvinyò wà cisuku awu. Kàdì Nyumà mulelèlè wa Nzambì, udi muswè bwà kukunyiibwa mu mwaba musungula, mùdì mamuma à Nyumà’s!

¹⁰⁴ Kàdì cyàkenzà Yesù pashìishe ncinyi? Wakamba nè: “Bu mùdìbì nè mukàjì awu mmuswè kwitaba cyòci aci. . .”

Wakamba nè: “Mukalenge, mpèèshèku Mâyì awu. Ndi muswè Mâyì awu.”

¹⁰⁵ Yèyè nè: “Lekèlè nyingù webè wa kale awu mwaba awu. Kabyèna bikukèngela kàbìdì nyingù wa màyi wà mùshindù awu to. Kabyèna bikukèngela mukàndà mukufùndila wà ku twitabaayi webè awu to. Lekèlè mùshindù wèbè mudyènzela wà ba-Presbytérien, wà ba-Baptistes, wà ba-Méthodistes, wà beena Mpenta, ùshiye paanyimà. Lwàku ku Mpokolo ewu. Nènku Nènkuujè nè disànkà diikala mwà kutùnkumuka bu musùlù.”

¹⁰⁶ Ànu mwàkamba muntu mununu wa bafìike awu nè: “Ndi nè ditalala bu musùlù.” Dìtùnkumuka muunya nè bufùku. Kumpàla kwà lufù, dìdì dìtùnkumuka ànu mùshindù wùm wèwùm wèwè awu.

¹⁰⁷ Pòlò wàkamba nè: “Lufù kalonda kèèbè kàdì penyi? Nè lukità bucìmunyi bwèbè bùdì penyi? Kàdì twasàkidila kùdì Nzambì udi utùpèèshila bucìmunyi ku Yesù Kilistò.” Cyà bushùwà’s.

¹⁰⁸ KuMutàngilayè. Kubangayè kuyiikila Nendè bwà mwaba wà dikuukwila. Ke kumwambilaYè nè: “Ndà ùkangàtè bàyeebè.” (“Nèmmumanyishè nè Nzambì newùcìdì nè mwoyi. Mèmè ndi Mwonji wà mvinyò.”) “Ndààku ùkangàtè bàyeebè.”

“Mòna’s,” mwàkambàye, “ncitu nè bàyaanyi to.”

¹⁰⁹ Yèyè nè: “Ncyà bushùwà. Uvwa naabò bàtaanu, nè ùdì musòmbe nendè mpindyewu awu kí mbàyeebè to.”

¹¹⁰ Mukàjì kukùdimukayè. Cìvwa ncinyi aci? Dyèndè—dyèndè disomekiibwa, mwoyi wà ku mwoyi wèndè, kwàkadiye mujoomònyìibwè ku mucì wà twitabàayi wà kale, kwàkadiye kacya wàkwàta aku, pààkabwela dipuuyakana dyà kumpàlā dyà Nzambì mu matàmbà èndè amu.

¹¹¹ “Mukalenge, ndi njingulula nè Wèwè udi Mupròfetà. Nè ndi mumanyè nè Mifùndù mmyàmbè nè Maasiyà neàlwe nè Yèyè neènzè cintu eci.”

Kilistò. Ke cyôci aci. Nànsha wêwè uya mu èkèleeziyà kaayi, paùdi ànu nè ulwàlwa ku Mpokolo udi mûle tètè nè Mashì awu.

¹¹⁹ Akidilà Mwoyi Wèndè, nè lekèlè Ùkubiishe, ùkubiishe ùkumusha ku dikàcila dyà maalu à pa buloba, too nè piikalà bintu byònsò byà pa buloba bifwè. “Ewu udi munangè maalu à pa buloba, anyi bintu byà pa buloba, dinanga dyà Nzambi kadyèna nànsha mene munda mwèndè to.” Kwèna mwà kutèeka mwoyi wà diwòji mu mwonji wà tumuma twà mvinyò, kàdi kukwàmawù tumuma twà mvinyò to. Nwamònu anyi? Pawikala wa Kilistò, udi unanga bintu byà Kilistò. Udi mûle tètè nè Nyumà. Udi...Yèyè ùdi Mwonji wà mvinyò; nwènu nudi matàmbà. Mulekèle Yèyè àkwakidilè mu dindà emu, mwàkenzàYe mukàji wa mu Sàmaalèyà amu, nè àteekè mwoyi wèbè mu Mwoyi Wèndè, nè àkuvwijè cifùkiibwà cipyacipyà.

Patùdi twinyika mitù yètù ànu bwà katanci kakesè cyanààna apa.

¹²⁰ Kumpalà kwà disambila, nkufwànyìnekù kwikala bàmwè bàdi bafwànyìne kwela cyanza cyàbò muulu anyi, bàmba nè: “Nsambidilèku, mwanètù, ndi muswè kwikala muswikàkane bikolè mu Kilistò.”? Nzambi àbènèshè mwoyi wèbè. Kaa, abi’s mbilenga be. “Ndi muswè kwikala mutàmbe kulamakana, mu Kilistò, bwà mwoyi wànyì kukenkawù Bwèndè. Mpàtulè mu mèmè (bwànyì) bwòwà bwànyì bwònsò, nè mpatà, nè dilubakana, nè twitabàayi. Nè unkùne munda Mwèndè, mu dindà emu, mündi mwà kupeta ditalala bu musulù. Ndi mubindulùke bikolè. Ncyèna mumanyè kùnyaayà to. Ncyèna mumanyè mùshindù mwinè wündi mwà kwimana to. Ntèèkè muntwamu’s.”

¹²¹ Mpindyewu patùcidì nè mitù yètù miinyika apa, nwènu bàdi mwà, bàdi beelè byanza byènu muulu abu, udikù mwà kujuukila kuulu, bwà mwàkù wà disambila anyi? Ànu... Netùkusambidilè, ànu mwaba wùdi awu. Bwalu, tudi nè... Juukilaayi kuulu mpindyewu, bwà twamònakù mwà kusambila.

¹²² [Katùpà kàà mukàbà wà mèyi munda mutupù—Muf.]... bàngacila ku bôbò, dilubakana dyònsò. [Katùpà kàà mukàbà wà mèyi munda mutupù.]...bwà kuswikakana nè dibènga kuneemeka Nzambi awu; bwà kwendela mu Bukènkè bupyabùpyà, kubangila ku ditùkù edi. Enzàku nànkù, Mukalenge.

¹²³ Wèwè wákamba nè: “Lòmba, nèupètè. Kèbaa, nèupètè. Kookòlà, nè nebàkunzùlwilè.” Mpindyewu bàdi bàkookola. Ndi ndòmba. Swàkù bàcìpètèku, Mukalenge. Swàkù bwà ditùkù edi dishintulule nsòmbelu yàbò mu mùshindù wà nè, too nè mwikalàku kàbidi kakùyì mpatà mikwàbò mu meeji àbò nànsha. Nènkù swàkù bwà bàlwe Kúdi Kumbèlu, mu Ditùkù adi.

¹²⁴ Mbiimàne kuulu, Mukalenge, mu dindà emu. Mbiimàne kuulu Bwèbè mpindyewu, kumpalà kwà bantu naabò. Wèwè udi

mwâmbè nè: “Ewu wíkala mwà kwenza cintu bu nànkù, Mémè nêntwè ku cyèndè kumpàlà kwà Nzambì nè Banjèlò bàà cijila. Kàdi yèyè muMfwè bundù, díbà adi, mu Ditùkù adi, Nèmmufwè bundù.” Mukalenge, bóbò kabèèna nè bundù to, mu dindà emu. Mbiimàne kuulu. Mpindyewu, Wèwè udi cyà bushùwà ulama Dîyì Dyèbè. Bùjèku nè Nyumà Webè, nè ùbàpèèshèku nsòmbelu wa mudimu, bwà nè, mu buloba bùcilwalwà, bààmònakù mwà kusànkà nè Bwikadi bwà Mukalenge Yesù bùtù kabùyikù bupangila abu. Kubangila ku ditùkù edi, kubangila apa, tudì tubàlàmbula Kùdì, mu Dîná dyà Yesù. Amen.

¹²⁵ Nzambì àkubènèshè. Muntu kampàndà udi pabwìpi naabò àbàlabùle ku cyanza, udi pabwìpi naabò awu.

Kùdi Mpokolo . . .

¹²⁶ Mpindyewu diyiisha dyàjikì, mpindyewu kuukwìlaayaaku Mukalenge, ànu bu babwitekù kwìsù.

. . . Mashi,
Makòka ku à Èmanùwèlè. . . (Awu's ùvwa
n'Nzambì, Èmanùwèlè.)
Nènku bangènzàmpèkààtù, (beena bupidyà)
biinyija . . .

Ambùlùjà, nyeema, lwàkù.

. . . mwìnshì . . .
Bàdi bàjimija dikeji dyàbò dyònsò dyà dipiilà.
Bàjimija . . .

¹²⁷ Mukuukwìlaayi ànu cyanàànà mpindyewu mu Nyumà. Mwoyi wèbè wikalè ànu mudilekelèla. Nànsha wèwè mwikalè wa mu èkèleeziyà kaayi. Ànu, mu mwoyi wèbè amu nè: “Twasàkidila, Nzambì munanga.”

Nènku bangènzàmpèkààtù . . . mwìnshì mwà
nkwaka awu,
. . . dipiilà dyàbò . . .

¹²⁸ Mpindyewu ndi muswè bwà nwélè cyanza cyènù muulu, nwènù beena Kilistò, mpindyewu, beena kwitabuuja, nè nwimbè naanyì nùnkù.

Nènku kacya ànu ku diitabuuja ngààmòna
musùlu awu
Wùdi mpùtà Yèbè yìdì yìzòlòloka ayi yìtwàla,
Mpindyewu kî n'twitabàayi kampàndà to, nwavùluka.
Dinanga dipikudi ndìkaadi cyena-bwalu
cyànyì,
Nènku nêdiìkalè nànkù too nè pangààfwà.
Nè nêdiìkalè nànkù too nè pangààfwà,
Nè nèngiìkalè . . . (Aci neciìkalè cyànyì . . .) . . .
Ndi mfwà;

Dipikudi... (Kí ndiseka to, kàdi dinanga
dipikudi)... ke cívwa cyena-bwalu cyànyì,
Nè nêdìikalè nànkú too nè pangààfwà.

¹²⁹ Nudi nwambilamù, kùdìYe anyì? Ambàayi nè: “Amen.”
[Disangisha didi dyàmba nè: “Amen.”—Muf.] Bùikalè nànkú.
Diitabuuja Dyànyì Nditàngìlè Kùdì.

¹³⁰ Mbanganyì bàdì bàsaama nè biikàlè mu lukèngelu, mu dindà
emu? Paanyimà pàà dyà nyumà, bìdì bìkukèngela dikwàcisha
dyà mubidi. Ela cyanza muulu, díbà adi tudì mwà kukumòna.
“Ndi mu lukèngelu, Mwanèètù Branham. Ndi—ndi mwab’ewu.
Ndi nsaama. Ncyèna—ncyèna ànu mwà kufika ku dyumvwa
bìmpè to. Nkàadi muteetètètè. Nkàadi muyààyaàye kùdì
ngàngàbukà. Ndi mwenzè byònsò bìmvwà mumanyè mwà
kwenza abi, kàdi ncyèna ànu mwà kucikumbaja to, mùdìbì
bìmwèka’s. Kàdi ndi ngiitabuuja nè Nzambi nèansàngàjè.” Nudi
nwiitabuuja nànkú anyì? Acì’s ke mulayi Wèndè.

¹³¹ Mpindyewu, udi mukùnyìibwe ku kàlā kwà misùlù yà Mâyì
anyì? Mâyì kaayi? Kilistò mutuucike awu, mu mùshindù wà nè
mu lubwebwe amu kufùkukamù mâyì bwà kusungila cisàmbà
cívwa cífwa aci ku lufù, Kilistò wàkatuuciibwa bwà nè mu
mubidi Wèndè mùpàtukè Nyumà Mwímpè, bwà nè cisàmbà
cívwa cífwa aci kacifu to kàdi cìikale nè Mwoyi wà Cyendelèlè.
Nudi...? Kùdì bintu bishìilèshìilàngàne byàbùngì...

¹³² Nzambi ùdì ùlaya bwà kwondopa. “Wàkatàpiibwa mpùtā
bwà dishipa dyètù dyà mikenji, muzaajìibwe bwà bubì bwètù;
dinyooka bwà ditalala dyètù dyàkapòna pambidi Pèndè; ku
mibùndàbùndà Yèndè twàkondopiibwa.” Misùlù, misùlù yà
Mâyì àmwèpelè, Nyumà Mwímpè.

¹³³ “Kùdì, dyàmbedi, bàpostòlò, bapròfetà, balongeshi,
batangadiki, bampaasàtā,” misùlù yà Mâyì àmwèpelè.

¹³⁴ “Kùdì mishindù mishìilèshìilàngàne yà mapà.
Bàmwè mbabiikidiibwe bwà kwamba cipròfetà. Bàmwè
mbabiikidiibwe, bapèèbwa dipà dyà dyondopa. Bàmwè bàdì
nè lungènyì. Bàmwè bàdì nè òimanya, ku Nyumà umwèumwè
awu. Bàmwè bàdì bààkula mu myakulu. Bàmwè bàyàndamuna.
Byònsò ku Nyumà umwèumwè awu,” Kolìntò wa Kumpàlā 12.
Ncinyì aci? Misùlù, misùlù yà mâyì àbùngì, mâyì àbùngì.

¹³⁵ Misùlù yàbùngì yà Mâyì àmwèpelè, Nyumà Mwímpè ùdì
ùfla mapà nè mabènesha àbùngì myaba yònsò. Ùdì ùtwàla mapà
mabanjìke, kàbìdì, mapà à dyondopa, mapà à lupàndu, mapà
à Nyumà Mwímpè bwà kukwàta mudimu mu èkèleeziyà wenù
nè munkacì mwà bantu. Misùlù’s! Nè disànka bu musùlù nè
mushìmì wà mâyì. Bilenga kaayìpu’s wè!

Diitabuuja dyànyì nditàngìlè Kùdì,
Wèwè Mwànā wà mùkòòkò wà ku Kàlvaryò,
Musùngidi wà kùdì Nzambi;
Mpindyewu ngumvwèku pàndì nsambila apa,

Umùshàku mpèkaatù wanyì yònsò,
Kaa enzàku bwà nè kuumukila ku leelù ewu
Ngìikalè mèmè yònsò. . .

¹³⁶ Mpindyewu, Mukalenge, ke disambila dyètù ndyòdì adi. Katwàkulwijakaja to. Eci nnsabatu. Edi's nditùkù dyùdì Wèwè mwenzè. Bìvwa bikèngela twètù kuKukuukwila ditùkù dijimà. "Ditùkù dijimà nè bufùkù bujimà," mwàkambà mwedi wa kasàlà nè: "Banjèlò bàdi ànu bàntàbaleela mèmè ewu." Mpindyewu tudi tuumvwa nè Bàdi pabwìpì.

¹³⁷ Taatù Nzambì, nyèwù ngàkùlù cintu cyà dísù dikolè menemene. Kàdi ncyèna mucyènzè. . . Kenkètàku mwoyi wànyì, Mukalenge. Pìikalàbì nè ndi mucyènzè ku budimù, dîbà adi mfwilèku luse. Kàdi ndi mucyènzè ku dinanga bwà ditàmbà Dyèbè, Mwonjì Wèbè wà mvinyò ewu. Ndi ndòmba, Mukalenge, bwà nè kwòkò muntu mwaba ewu udi muswikàkàne mu màngumba manène, nwàvùlukaayi. . . Ncyèna nteeta bwà kubàlòmba bwà kuumukayè ku dyòdì adi to. Ndi mmulòmba ànu bwà kàshàadi mufinyina panshi kùdì twitabàayi yàbò ayi to, kàdi bwà àlwe Kùdì, nè ikale mudilekèlèlè nè mwipila, nè Nyumà mwicikija munda mwèndè. Dîbà adi èkèleeziyà wabò neàlwe èkèleeziyà mutàmbe bwimpè, èkèleeziyà wa nyumà, uWikalà nè cyà kulwila awu, kàyi katobà anyi kàyi mufudì to, musukula mu Mashi à Mwànà wa mùkòòkò. Buloba bwà mamanya à mu mitù ebu, leelù ewu, Taatù, mbulalùke ku cyòci aci. Bàdi bènda bàkebangana nè misumbà minène yà bantu nè èkèleeziyà minène, bu mwonjì wà mvinyò wà cisuku. Kàdi, Mukalenge, tudi—tudi tulamata ku mamuma à kalolo awu, mamuma à Nyumà awu, àdi àtwàdila musùkà wètù kalolo awu.

¹³⁸ Tudi tulòmba mpindyewu bwà Ûbeneshèku babèèdì bàdì bàlwa kumpàlà eku bwà kubàsambidilabò aba. Mukalenge, ndikù mwà kuKulòmba kàbìdì musangu ewu, uDikù mwà kujidila ditàmbà didì kadiyì dikumbànyine edi, ku Mashi Èbè anyi? Bwà Nyumà Webè àpòngolokèmu, àleejè patòòke Nzambì udi nè mwoyi awu, bwà nè Wèwè udi Nzambì umwèumwè uvwa wakula nè mukàjì wa ku ciinà cyà màyi awu. Bìikaleku nàнку, bwà bantu kabàshàadikù mu cimvundu nànsha, bwà bààfwànyina kumòna mwaba menemene wùdì Nyumà wa Nzambì ùsanganyilbwa, ùdì mu mwoyi wà mwena kwitabuuja, kí mmu èkèleeziyà kampàndà to, kàdi mu mwoyi wà mwena kwitabuuja. Enzàku nàнку, Taatù. NènKwindile mpindyewu, bwà Wèwè kuDileejà, bu muWàkaDileejà patòòke mu matùkù à kale amu. Bu muwàkaDileejilà patòòke ku Yesù, Wàkafwà bwà twamòna mwà kwikala bakezùke awu, bwà nè Nyumà umwèumwè uvwa munda Mwèndè awu wàmòna mwà kulwila munda mwètù, ùtwàlamù bipeta bimwèbimwè abi. Enzàku nàнку, Taatù. Bwalu ndi ndàmbula bintu byònsò Kùdì, mu Dìnà dyà kunanga dyà Mwàn'Èbè, Yesù. Amen.

Kùndekèdìku mpàmbuka

Nya kule nè luseke Lwèbè nànsha.

¹³⁹ Èyo, Teddy, *Itàbùùjà Nàka*. Mpindyewu mbanganyi mwab'ewu bàdì...? Billy mmwàmbè nè mmwabànye ndambù wa twartà twà disambila.

¹⁴⁰ Mpindyewu tuvwa, mu èkèleeziyà, bu mùvwàye mupàte patapata, twangata ànu nè tulòmba bônso bàvwà beenyi munkaci mwètù abu bwà kujuukila kuulu, nè kulekela Nyumà Mwímpè ùpàtuka mu bantu amu nè ùbàjingulula mùshindù awu. Tudi benzè nàнку, misangu yàbùngì. Mpindyewu, kùkaadi ndambù wa mbingu, muntu kampàndà wàkamba nè: “Kàdi mbikolè bwà bantu kuumvwabò cyòci aci. Kàdi mbaswè mulongo wa babèèdi.” Pa nàнку tadi... Mbanganyi bàvwàku kaaba aka pàakayà Nyumà Mwímpè mu musumbà wa bantu awu nè kwangata muntu yònsò mu musumbà wà bantu amu? Bushùwà's.

¹⁴¹ Mpindyewu, mvwa mwambile Billy bwà kwabanya ndambù wa twartà, bwà twamòna mwà kubiikila bantu, ku bisumbù ku bisumbù, nè kubàsambidila, nwamònu's, bwà kucijikija.

¹⁴² Ke dībà adi, nè dyàkàmwè paanyimà pàà eci, nebiikalè nè cyà kwenza mudimu wa dibàtiiza bwènù nwènù bàdì bàjinga kubàtijiibwa abu. Netùnùpèèshè mwaba, dībà, ànu mu tusunsa tukesè cyanààna.

¹⁴³ Dyàmbedi, tadi baakùle bwà cyòci eci. Tudi baakùle bwà Mwonji wà mvinyò ewu, bumpyànyi bwà Nzambi ebu. Mpindyewu, aci cyòci cilelèlè, dībà adi tadi cyà bushùwà ditàmbà didyànjila kulongolola ku Muci wà mvinyò awu, dībà adi bìdi bikèngela bwà Nyumà Mwímpè umwèumwè awu àlwilè munda mwètù. Nènku Cyòci cyenzè nàнку, neCicyènzè cintu cìmwècìmwè cyàkenzelàYe ku Yèyè aci, bwalu Yèyè ke Mwonji wà mvinyò. Twètù tadi matàmbà. Nènku piikalà... Mwoyi ùdi mu Mwonji wà mvinyò awu ùdi nè cyà kwikala mu ditàmbà, bwà kuvwija ditàmbà adi nè mwoyi. Piikalàci citwàla dishiilangana ku cidi Muci wà mvinyò awu mupàtùle, dībà adi cidi mwonji wà mvinyò mubi. Ke cìndi nteeta kwamba ncyòci aci. Cidi nè cyà kwikala Mwoyi wùmfwèwùmfwè awu.

¹⁴⁴ Mpindyewu, mbanganyi bàdì nè twartà twà disambila? Elà cyanza cyèbè muulu!...?.. Èyo. Mbibangile penyi's, kuumukila ku ùmwè too nè ku makùmi àtaanu, anyi ùmwè too nè ku lukàmà? Anyi, mbanganyi bàdì bamanye? Kùdikù—kùdikù twartà twà disambila kumpàlà kwà... Indilaayi. Mpindyewu, nganyi udi nè nombà ùmwè? Kùdikù kartà kàà disambila nombà ùmwè munda emu anyi? Udipù anyi? Èè, Mbibangile penyi, dībà adi, makùmi àtaanu? [Mwanèètù wa balùme kampàndà ùdi wàmba nè: “Ùmwè too nè ku makùmi àtaanu.”—Muf.] Kaa, kaa, kaaba aka, umwe too nè ku makùmi àtaanu. Èyo.

Imàna ànu mwaba awu, wamònu's, nombà ùmwè.

Nombà ibidì. Nombà ibidì. Èyo, imàna ànu mwaba awu.

¹⁴⁵ Nombà isàtù, kartà kàà disambila nombà isàtù. Ùdi mu nzùbu emu anyi? Ùdi mwà kujuukila kuulu anyi? Mfwilaayikù luse. Bàdi naatù, mu myaba yònsò. Nombà isàtù, udikù mwà kulwa apa anyi, inàbànzà?

¹⁴⁶ Nombà ìnaayi. Nganyì udi nè kartà kàà disambila kàà nombà ìnaayi? Nda buludì kwàka, inàbànzà. Nombà ìnaayi, ki ùmvwa mumòne anyi? Ki yéyè awu anyi. . . Nganyì udi nè nombà ìnaayi? Èyo.

Nombà ìtaanu, nombà isambòmbò, mwandamutekète, mwandamukùlù. Mwandamukùlù, nombà mwandamukùlù.

¹⁴⁷ Citèemà. Mpindyewu indilaayi apa. Nombà mwandamukùlù, citèemà. Bàmwè bantu mbapàtùke, bìdi mwà bìikala, mbafwànyine kwikala umwe wa ku yòyì ayi. Nombà citèemà.

¹⁴⁸ Nombà dikùmi, nombà dikùmi nè ùmwè, nombà dikùmi nè ìbìdi, dikùmi nè isàtù, dikùmi nè ìnaayi, dikùmi nè ìtaanu.

¹⁴⁹ Yóyóyò! Nkumpangike bànaayi anyi bàtaanu. Nàнку netùfikeku. Pàmwàpa mbapàtùke pambèlu. Muntu yéyè mubwele, Mwanèètù Taylor, ùtàngilè ùmonè ní bàdi nè twartà twà disambila kuntwaku. Ùbàbwejè mu mulongo, bu wèwè mwà kuswà. Bu bóbò nànsha mwà kwikala bapàtùke bayè too nè mu mwaba kampàndà lwà mu ndekeelu mwàmwa.

¹⁵⁰ Mpindyewu nèndombè kaneemu kààbùngì menemene, nènku ikàlaayi ànu nè kaneemu kààbùngì.

¹⁵¹ Mbanganyì mwab'ewu bàdi bàsaamà kàdi kabàyi nè kartà kàà disambila? Nudikù mwà kwela byanza cyèbè muulu kwamba nè: "Ndi nsaama nè mu lukèngelu nè nciyi nè kartà kàà disambila to." Èyo. Mpindyewu tàngilà mu nùнку ewu nè itàbùùjà. Èyo.

Mpindyewu, Mwanèètù Teddy, bitùlùbitùlùlù menemene.

¹⁵² Mpindyewu, bantu aba bóbò kabàyi babwelè to, tudì mwà kutùngunuka nè mulongo wà babèèdi, mwaba kampàndà mukwàbò. Kàdi netwìndilè, bwà kubàpèèsha kaaba.

¹⁵³ Mpindyewu, ke díbà edi dìdi bintu byònsò bìndi mwámbe nè cyà kujaadikiibwa nè mbilelèlè anyi byà mafi. Bible kèna wàmbakù nè: "Nùkenketè bintu byònsò. Nè nùshaalè bakwàtè bikolè ku cidi cìmpè anyi"? Mpindyewu bu. . . Yesù, mwikàle Mwonji wà mvinyò wà Nzambì, mujìngile Nkwasa wa butùmbi wa Nzambì, è kutwàdilaYè Èkèleeziyà Mwoyi wà Cyendèlèlèlè, nè twètù tudì matàmbà à Mwonji wà mvinyò awu. Nwamònu anyi?

¹⁵⁴ Wàkakùna Izàlèlèlè mu Pàlèstinà. Kabyàkakùmbanaku to. Bààkalwa bu mùdi. . . Mamuma àbò àkafùbidila bu mùdi byowelawela amu. Byàkatòloka bufùku bùmwe, kàdi kufùbidilabi, bileeja nè kabìvwa bìmpè to. Kabìvwa nè cyà "Cyendèlèlèlè nànsha."

155 Kàdi mamuma àdi mu Kilistò Yesù neàshaalè kashidi. Bidi nè cyà kwikala nànkù. Nènku piikalà Nyumà Wendè, uvwa pambidi Pèndè awu, muciiakàle ànu nè mwoyi leelù ewu, kî ndingumba dyà cyowelawela to. N'Nzambi udi nè mwoyi udi utwàla Mwoyi wùmwèwùmwè wàkatwàlàYe awu. Nudi nwitabuuja nànkù anyi?

156 Mpindyewu, kadyàkudyùja ànu pàtupu' nè kwamba nè: “Kaa, bintu abi bivwa bwà ditukù dikwàbò to. Kaa, Ncintu kampàndà cyà mùshindù ewu.” Dyòdi dyenze nànkù, ikàle mujoomònyibwe, mu dindà emu.

157 Ncilelèlà. M'Mwoyi mulelèlà. N'Kilistò mulelèlà. Mpindyewu udi nè diitabuuja nè witabuuja, nènku kwèdiku mpata nànsha mikesè to bwà nè Nzambi ùdi kaaba aka bwà kwondopa babèèdi.

158 Mpindyewu, nwènu bàdi kanùyì nè kartà kàa disambila abu, nwènu mwà kusambila nè kwitabuuja ànu nè mwoyi wènu wònsò, dìbà adi—dìbà adi Nzambi neà—Nzambi neànùpèèshè bintu binùdi nulòmba abi. Mbanganyì bàdi biitabuuja nànkù mpindyewu?

159 Mpindyewu ndi muswè kunùkonkakù cikwàbò cintu. Bu Nzambi mwà kwenzaku nànkù... Mpindyewu twànjàayibi kumòna ní kùdikù muntu mu mulongo emu ùndi mumanyè. Kakwèna muntu nànsha umwe kaaba aka ùndiku mumanyè to.

160 Èyowà's, Mwanèètù wa bakàji Logston. Kî ngwèwè Mwanèètù wa bakàji Logston anyi? Mmwòmò anyi? [Mwanèètù wa bakàji Logston ùdi wàmba nè: “Ncyèna mu mulongo amu to.”—Muf.] Kaa, wèwè kwèna mu mulongo to. Wàmfwilakù—wàmfwilakù luse.

161 Ndi ngèèla meeji nè bantu bònsò abu mbeenyi kùndi mpindyewu. Ncyà—ncyà bushùwà anyi? Ncyèna mumanyè kantu nànsha kàmwè pa bwalu bwènu to. Elàayi byanza byènu muulu piikalàbi nè ncyà bushùwà. Mwaba awu, mmunyi mwènzèkì aci's? Ànu mwènzèkìci mwine's, ànu ku dipweka nè kwelesha mulongo wà babèèdi nè twartà twà disambila, muntu yònsò udi naatù dijinga mwab'ewu, nè kùdi mene aba bàvwà pàmwàpa... kùdi bàdi bapangike? Mmunyi mùdici cyenzèka's? Mulongo mujimà kuntwaku, muntu nànsha umwe kaaba aka mpindyewu mu tabernacle emu. Ncyèna ngèèla meeji nè aci ncyenzèkekù kwònsò eku to.

162 Mpindyewu nwènu bàdi kanùyì nè kartà kàa disambila abu. Kùvwà mukàji kampàndà wakadifinda mu musùmbà wà bantu amu, musangu kampàndà, nè kulengayè luzemba lwà civwàlù Cyèndè, bwalu wàkamba nè: “Ndi ngiitabuuja. Cidi nsaserdòsè wàmba nànsha ciikàle cinyi, anyi ní nganyì mukwàbò yònsò. Mèmè ndi muMwitabùùje. Mèmè ànu mwà kulenga civwàlù Cyèndè, nèngòndopiibwè.” Nudi bamanyè bwalu-bulonda abu anyi? Ke kulengayè civwàlù Cyèndè. Ke kukùdimukaYe kùdiye

è kumwambila nè disaamà dyèndè dyà mashi àlwa munda adi dyàkiimanyiiibwa. Diitabuuja dyèndè dyàkamusàngaja. Nudi bamanyè nè aci m'Bulelèlà anyi?

¹⁶³ Èè, Yèyè ùdi Mwakwidi Munène umwèumwè awu mu dindà emu. Ùdi pa Nkwasa wa butùmbi wa Nzambi. Dìyì Dyèndè, ke Matàmbà Èndè ngòwò awu, Dìyì dyà Nzambi dipàyika ku Nkwasa wa butùmbi wa Nzambi kumpàlà kwà difùkà dyà dyulu nè buloba. Nudi nuciitabuuja anyi? Cyàkatwàla Mwoyi, Kilistò Yesù awu. Ku Mwoyi awu, kutwàlaci matàmbà, cidi citwàla Mwoyi wùmfwèwùmfwè wùdìWu awu wùfùmina ku Nkwasa wa butùmbi. Ncyà bushùwà anyi? Pashiishe Yèyè mmusòmbè, ngiikàdìlù wa miji Yèndè leelù ewu, ùdi ku dyàbalumè dyà Mutàmbe bunène mu Dyulu, bwà kupàtula Mwoyi wùmfwèwùmfwè awu mu Èkèleeziyà Wendè. Yèyè m'Mwakwidi Munène udi mwà kulengiibwa kùdì dyumvwa dyà mateketa ètù. Aci's ncilelèlà, kí mmwòmò anyi? Mpindyewu udi witabuuja aci nè mwoyi wèbè wònsò's.

¹⁶⁴ Yèyè mucyènzè, mbanganyì bàà kunùdì nwènù babèèdì bàdì kuntwaku biikalà mwà kuciitaba? Nwènù bònsò anyi? Mpindyewu, Teddy. . .

¹⁶⁵ Mpindyewu mukàjì kampàndà nyèwù mwimàne kaaba aka, uvwa mwele cyanza cyèndè kuulu nè ncìvwa mumumanyè to. Nè Nzambi mmumanyè nànkù, bwà ku dyànyì pàànyì dimanya, ncitukù mwànji kumumòna kwònsò eku to.

¹⁶⁶ Ùdi mwà kwikala mene wa mu cimenga eci. Ncyèna mumanyè to. Nciyèna kàbìdì mumanyè cyàbisàtù cìmwè cyà bantu to. Bantu bapyabàpyà mbabwelemù. Mvwa nè ciibidilù cyà kupweka mu cimenga, mvwa—mvwa mumanyè muntu nè muntu. Mpindyewu, bìdì ànu bu nè, ncyèna mumanyè muntu nànsha umwe to, bwalu bààbùngì mbalwè munwemu.

¹⁶⁷ Ncyèna mumanyè mukàjì ewu to. Yèyè kí mmumumanyè to. Kàdì bu Mwoyi wùmfwèwùmfwè wùvwà mu Mwonji wà mvinyò awu, ùvwà mulayè nè ditàmbà nedikwamè mulongo wùmfwèwùmfwè wùvwà. . . Mwoyi wùmfwèwùmfwè wàkatwàla Mwonji wà mvinyò awu. “Ewu udi ungiitabuuja Mémè, byenzedi bìNdi ngenza yèyè neàbyènzè pèndè.” Aci m'Mufundu anyi? Yone Munsantu 14.8. Eyo.

¹⁶⁸ Mpindyewu, piikalàbì nè mudimu wàkenzàYe, kuyiikila nè mukàjì wa ku ciinà cyà màyi awu nè kumwambila cintu kampàndà cìvwà cintu cisokoka mu nsòmbelu wèndè; bu Nyumà Mwimpè umwèumwè awu, mu dindà emu, mwà kukwàcila mudimu mu èkèleeziyà emu, nè kwakwila kùndì, nè kwambila mukàjì ewu cintu kampàndà cìdiye mulwìlè kaaba aka, anyi cintu kampàndà cìdì mu nsòmbelu wèndè, anyi cintu kampàndà cikwàbò cìdiye mumanyè nè ncyèna mumanyè kantu nànsha kàmwè pa cyòcì aci to. Bwalu, mémè nciyi mumumanyè to,

èè, ncyèna—ncyèna mumanyè kantu nànsha kàmwè pa bwalu bwèndè to. Yèyè mmwimàne ànu kaaba aka.

¹⁶⁹ Kàdi bu Nyumà Mwímpè awu mwà kwenza nàнку, kabiyi mwà kupangila to. Ke Diyì dyà Nzambi edi, dicilayè's. S'ki twètù bônso bàbìdì aba, twamba, twètù bônso bàbìdì nè: "Kacya katùtukù bânji kumanyangana muntu nè mukwèndè to, kacya katùtukù bânji kumòrangana muntu nè mukwèndè to." Bu Nyumà Mwímpè mwà kubuulula aci, dībà adi, Mwoyi wùmwèwùmwè wùvwà mu ditàmbà adi awu wùcidi ànu nè mwoyi, anyi mu Mwonji wà mvinyò amu's wè, munkaci mwà kupuuyakeena mu ditàmbà amu. Mukalenge Nzambi àcìfilèku.

¹⁷⁰ Mpindyewu, mu Dîna dyà Yesù Kilistò, ndi ngàngata nyumà yònsò udi munda emu ku bukòntononyi bwànyì, bwà bwalu bwà Bukalenge bwà Nzambi. Mpindyewu, ikàlaayi mpindyewu ànu nè kaneemu kàà menemene, muntu nè muntu.

¹⁷¹ Tudi tutwìlangana bwà musangu wètù wà kumpàlà, muntu mulùme nè mukàji, ncintu kampànda bu mwàkadibi mu Mifùndu's. Nzambi ùdi munkaci mwà kwanyishila cyôci eci, pàmwàpa, bwà nè bantu, mu Ditùkù dyà Cilumbulwidi, bààfwànyina kumanya nè, kabèèna nè pàà kubingila to. Bu muntu mwà kuumuka mu dindà emu, kàyi mukùnyibwe mu Kilistò to, kàyi mumanyè bwímpè Bwèndè nè luse Lwèndè to; kàyi naabi kwàka to, mmufwànyine kwikala nè mpungà mukesè menemene, mùndì mwà kudìfwànyikijila, ku Ditùkù dyà Cilumbulwidi. Pàdi Diyì dīyiishibwe, nè pashiishe piikalà Nyumà Wèndè. . .

¹⁷² Nwamònu's, ncintu cìmwè, bwà kuyiisha cintu kampànda. Yèyè mwikàle Nzambi wa maalù-malonda, dībà adi aci's ke cyàkenzàYe ànu mu maalù-malonda. Kàdi piikalàYe cyà bushùwà Mwonji wà mvinyò, nè twètù biikàle matàmbà, dībà adi ditàmbà adi didi ànu citùpà cyàwù menemene. Mwoyi ùdi mu Mwonji wà mvinyò awu wùdi munkaci mwà kupuuyakeena ànu mu ditàmbà, nwamònu's, nàнку nebiikengele bwà kupàtuladi cintu cìmwècìmwè aci. Yèyè ngudi mulayè nàнку. "Èwu udi ungiitabuuja Mémè, byenzedi bīNdi ngenza neàbyènzè pèndè."

¹⁷³ Mpindyewu, pawikalà usaama, nènku, nè—nè ncyèna mumanyè to. Kàdi wèwè usaama, mémè ncyèna mufwànyine kukwondopa to, bwalu aci Yèyè ùkaadi mumanè kwenza.

¹⁷⁴ Kàdi mbifwànyine kwenzeka nè Bwikadi Bwèndè kaaba aka bùdi mwà kukufikisha ku dyumvwa ànu menemene nè Yèyè ùdi kaaba aka. Dībà adi aci ncifwànyine kukolesha diitabuuja dyèbè bwà kucitaba. Nwamònu anyi? Ke mùshindù awu wùvwàbi mwà kwenzela batèèleji's. Cidici cifwànyine kwenzela mukàji ewu aci, ncifwànyine kwenzela muntu nè muntu yònsò wa kunùdi. Mpindyewu wèwè itàbùùja ànu aci.

¹⁷⁵ Bwalu: "Wàkatàpiibwa mpùtā bwà dishipa dyètù dyà mikenji. Ku mibùndàbùndā Yèndè twàkamana kondopiibwa."

Twâkamana. Kale wàwa kùkaadi ntàntà mule, kùkaadi bidimu binunu bibìdì, lupàndu nè dyondopa byàkalwa dībà adi.

¹⁷⁶ Mpindyewu wêwè udi wamba nè: “Cyûdì wakwila ncinyi’s, Mwanèètù Branham?” Ndi mmòna ciikalà Nyumà Mwîmpè mwà kwamba. Ncyèna mumumanyè to.

¹⁷⁷ Nè mwaba mukolaakòlààyì mutàmbe wùntùku mupetè bwà kwenza masangisha, s’ngapa mene. Bwalu, aci’s ke cyàkamba Kilistò nè: “Mupròfetà mu ditùngà dyàbò sungasunga, munkaci mwà bààkwàbò sungasunga.” Nwacimònu anyi? “Wàkabwela kùdì Bèndè sungasunga, kàdì Kàvwa mwà kwenza bintu byàbùngì to.” Wàkuumuka kuya. Mpindyewu, kí mbwà kasumbu kakesè aka to. Kí nnànkù to. Èkèleeziyà wanyì, mbannangè nè bangiitàbùjè. Kàdì’s mbeena pambèlu. Nè Dìyì dyà Nzambì dyàmbè. Didi dyàmba nànkù.

¹⁷⁸ Kàdì ndi—ndi munkaci mwà kwindila ànu kakesè, bwà kumòna Nyumà wa Nzambì ní wàndaabakù bwà kujandula. Mpindyewu, yèyè ùdì nyumà nè yèyè ùdì mubidi. Dìngà ditùkù nyumà nèumuke, nè dībà adi mubidi newùbolè. Nyumà ùyaaya kùdì Nzambì Wàkamufila awu. Nyumà nyèyè ewu, pèndè, mwimàne kaaba aka, kàdì mmuleejìbwe mu mubidi wà musunya. Mpindyewu piikalàbì nè nyumà eyi mmiswikila mu Mwonjì wà mvinyò awu, neyitwalè. . .

¹⁷⁹ Cìvwa ncinyi aci? Pààkalwà nyumà kampàndà kumpàlà kwà Yesù, uvwa nè ncintu kampàndà cibi, Nyumà uvwa munda Mwèndè awu wàkacibuulula. Nwamònu anyi? Nènkù mukàjì awu, pààkacibuululà Ye, wàkaciitaba, nè kwamba nè: “Wèwè udi nè cyà kwikala ànu Maasiyà awu. Tudi bamanyè nè pààlwà Ye, Yèyè neàtwàmbilè maalu aa.”

¹⁸⁰ Peetèlò, pààkalwàye, kaa, s’ùvwa ànu bu wàkadikonka cìvwa Andèlè wàkula aci’s. Ùvwa wàmba nè: “Yèyè’s ke Maasiyà awu.” Kàdì mmwenzè ànu ùfika kùdì Ye, Yèyè kwamba nè: “Dìnà dyèbè n’Simonà. Udi mwànà wa Yona.” Aci cìvwa cikùmbàne bwèndè yèyè. Nwamònu anyi? Ùvwa mumanyè nè Yèyè kàvwa mumanyè nè yèyè ùvwa nganyì to.

¹⁸¹ Kàdì Yèyè mmumanyè nè wèwè udi nganyì. Mèmè ncyèna mumanyè nè wèwè udi nganyì to, kàdì Yèyè ngudi mumanyè. Ncyèna mumanyè kantu nànsa kàmwè bwà bwalu bwèbè to, kàdì Yèyè ngudi mukumanyè.

Mpindyewu, ke Yèyè ewu’s. Mpindyewu Nyumà wa Nzambì ùdì ku cyoshelu eku.

¹⁸² S’kì Cyôcì aci. S’udi mumanyè nè cintu kampàndà ncyenzèke. Udi kaaba aka mbwà disaamà dyà dibinduluka. Ncyà bushùwà. Udi kàbìdì nè binyòka. Aci’s mbulelèlè. [Mwanèètù wa bakàjì awu ùdì wàmba nè: “Bìdì nànkù.”—Muf.] Nudi nwitabuuja anyi? Kacya bandela ncitu mwànjì kumòna mukàjì ewu to.

¹⁸³ Mpindyewu, aci kí ncyà kalolo anyi, cyà bushùwà aci... Ndi mumanye nè nudi benzèjìibwe bwà kuCyùmvwa. Mémè ndi munkàci mwà kuCitàngila. Nwamònu anyi? Byenze ànu bu divwayila dyà kalolo's.

¹⁸⁴ To, ndi mmòna muntu ùlwa kaaba aka. Mmwanèènu wa balùme. Udi mumusambidile bikolè be. Ndi mmòna wa bidimu bishàadile, nsongàalùmè wa bidimu bishàadile. Udi nè cyà kwikala mwambi. Mmwanèèbè wa balùme. Udi nè lutàtù lwà nyumà. Udi mulwè ntàntà mule, bwà kufika kaaba aka. Udi mufùmìne ku Sud, wenda ulwa mu njila ewu. Udi wa ku Tennessee. Udi Mandamu Tabor. Alùkilà. Udi nè dilòmbà dyèbè. Nzambi ùdi ùkupèeshadi. Bu...

¹⁸⁵ Mpindyewu, kacya ncitukù mulenge mukàji awu to. Nyumà Mwímpè ngudi mwenzè nànkù. Mpindyewu, ke mùshindù wùmfwèwùmwe awu...Ke mùshindù wùmfwèwùmwe awu wàkenzekàbi mu Bible anyi? Mukàji awu wàkamba nè: "Wèwè udi nè cyà kwikala Maasiyà." Mpindyewu, aci kacýena cyùmvwija nè *mémè* ndi Maasiyà to. Aci cidi cyùmvwija nè Nyumà wa Maasiyà ùdi kaaba aka. Tudi ànu bantu balùme nè bakàji. N'Nyumà wa Maasiyà.

¹⁸⁶ Mpindyewu, nwènu Cyàkidilaayi, nujoomonyiibwè, mu bupidyà bwà kale abu, nè nukùnyiibwè ànu ku luseke Lwèndè mene, nwamònu's. Mpindyewu juukilà kuulu wàmbè nè: "Mukalenge Yesù, Wèwè bu Mwàna wa Nzambi, Mwakwidi Munène awu. Mwanèètù Branham's wáfumu ku dyamba nè Wèwè udi musòmbè mu Bunène mu Dyulu mwàmwa. Wèwè uvwa mudyànjila kulongolola kumpàlà kwà difùkà dyà dyulu nè buloba, Wàkashipiibwa, bwà kutwàla bipeta ebi; nè, mémè, mwena kwitabuuja wa mushiikile mun njila, nteeta bwà kwitabuuja, ngàmòna mwà kwenjiibwa bwà kwitabuuja mu kaabujimà. Enzàku ndengè civwàlù Cyèbè. Mwenzèjèku bwà kwakulayè naanyi." Wèwè udi...

¹⁸⁷ Nwènu mu batèèleji amu, ambàayi cintu cìmwècìmwè aci. "Bwalu Wèwè mwikàle umwèumwè awu makèèlèlè, leelù, too nè kashidi, Wèwè—Wèwè—Wèwè ndekèlè nKulengè nè diitabuuja dyànyì, kutèeka ku luseke meeji ónsò à dibènga kwitabuuja awu. Ndekèlè nKulengè."

¹⁸⁸ Ndi ngèèla meeji nè uvwa mwèlè cýanza cyèbè muulu, wèwè pèèbè, nè katwèna bamanyàngàne to. [Mwanèètù wa bakàji awu ùdi wàmba nè: "Ndi mwèlè."—Muf.] Èyo. Mpindyewu, bu Mukalenge Yesù mwà kunsokolwela, cintu kampàndà cidi—cidi cikutacisha, anyi cintu kampàndà cyà mùshindù kampàndà, udi mufwànyine kwitabuuja nè—nè—nè nshinga wa Disungila ewu, wa nè Èkèleeziyà bulelèlè mmukùnyiibwe mu Nzambi. Yesù wàkamba nè: "Mu ditùkù adi, nenùmanyè nè Mémè ndi munda mwà Taatù, Taatù ùdi munda Mwànyì; nè Mémè munda mwènu, nè nwènu munda Mwànyì." Nwamònu anyi? M'Mwoyi

wà Nzambì awu wùtuucila nkòkà mu Dìná dyà Yesù Kilistò, wùpweka buludì mu Èkèleeziyà, nwamònu's, wùtùvwija umwe. Tudi matàmbà. Tudi baleeji Bèndè bàà mpàla.

¹⁸⁹ Wèwè mwiatabùuje aci, disaamà dyà makàsà adi ndifwànyine kuumuka. Udi mufwànyine kucitabuuja anyi? [Mwanèètù wa bakàji awu ùdi wamba nè: “Ndi ngiitabuuja. Ndi ngiitabuuja.”—Muf.] Èyo. Udi mwà kucipeta. Nè bàyeebè mwaba awu mmufwànyine kwondopiibwa, yèyè pèndè. Udi witabuuja nè mmufwànyine kwondopiibwa, ku kààmunda anyi? [“Èyowà.”] Wèwè, mukalenge, udi witabuuja nè udi mufwànyine kwondopiibwa anyi? [Mwanèètù wa balùme awu ùdi wamba nè: “Amen.”] Uh-huh. Udi witabuuja anyi? Udi nè mwànà wa bakàji, kàbìdi. Yèyè ùdi nè nyumà kampàndà wa lutàtù kampàndà lwà mu nyumà. Udi mufùmìne ku Nord, ulwa mu nùнку ewu. Udi upweka nè cibeeba. Udi wa mu Austin. Dìná dyèbè m'Màndàmù White. Aci's ng'EMU MMÙDÌ MUKALENGE WAMBA. [“Kaa!”] Alùkìlà wìtabuuje mpindyewu, nè wòndopiibwè, nè pashìishe ùsangalè. Nzambì àkupèeshèku dijìnga dyà mwoyi wèbè.

“Bu wèwè mwà kwitabuuja, bintu byònsò bìdi mwà kwenzeka.”

¹⁹⁰ Mwoyi wà Mwoyi wà Kilistò, mu ditàmbà. Ditàmbà kì m'Branham Tabernacle to. Ditàmbà kì ng'William Branham to. Ditàmbà ngwèwè yònsò wajoomonyiibwa ku bupidyà bwèbè, nè kukunyiibwa mu Yèyè.

¹⁹¹ Ndi ngèèla meeji nè uvwa mwelè cyanza cyèbè muulu, wèwè pèèbè, nè katùvwa bamanyàngàne neebè to. Ncyèna mukumanyè to. Nzambì ngudi bushùwà mukumanyè. Kwèna mulwè apa bwèbè wèwè mwinè to. Mbwa mwànà awu. Ndi mmòna Bukènkè bulebèlèlè kumutù kwà mwànà awu. Bu Nzambì mwà kunsokolwela cidi citàcisha mwanèèbè awu aci, newitabuuje nè ndi mupròfetà Wendè, nè witabuuja nè ndi nkwabwila bulelèlè anyi? Udi mufwànyine kwitabuuja. Mwànà awu ùdi nè disaamà dyà mwoyi. Ncintu kampàndà bu mùdì sùpapè amu, mwàkamba ngàngàbukà. Ncicipicishila ku diteeta. Mmushwè kucitùma ku cyondopelu cisungùlùke dyàkàmwè. Ncyà bushùwà. Udi wa mùnwemu mu Jeffersonville, lwà mu mùsèèsù emu, Mùsèèsù wà Fulton. Kàdi aci's ncyà bushùwà. Nènku dìnà dyèndè ùvwa Mandamu Burkhart, Irene Burkhart. Alùkìlà, nè itàbùùja bwà mwànà awu, yèyè neàsàngalè.

¹⁹² “Bu wèwè mwà kwitabuuja, bintu byònsò bìdi mwà kwenzeka.” Bu wèwè ànu mwà kwitabuuja cyanàànsà's!

¹⁹³ Mukàji udi musòmbe apa ewu nè disaamà dyà dibinduluka adi. Èyowà. Dìpwe mwoyi. Udi walukila kwèbè kumbèlu, neùmvwè bìmpè mpindyewu.

“Bu wèwè mwà kwitabuuja!”

194 Wêwè udi nè cyanza cyela muulu mùshindù ewu, udi nè disaamà dyà nyimà. Udi witabuuja nè Nzambi neàkusàngàje anyi? Udi witabuuja, uciitaba anyi? Nànkù alùkilaaku kwèbè kumbèlu ùsangalè. Yesù Kilistò ùdi ùkusàngaja.

195 Dyèbè ndyà toonyi. Pa nànkù, nda mutàngile kumpalà, wêwè udi nè dyèbè, wêwè pèèbè, mukalenge. Nzambi àkubènèshè.

Ikàlà nè diitabuuja mu Nzambi. Kwèdi mpatà to.

196 Mukàji wa bafiike. Bàdikù bàbidì bajimà. Ànu lwà paanyimà pààpa. Cyùja pa muminu, mu muminu. Itàbùùjà nè mwoyi wèbè wònsò. Udi uciitabuuja anyi, inàbànzà? Kafulu kakesè kàà cijèngù bu nànkù awu, mwaba awu. Udi witabuuja anyi? Elà cyanza muulu. Èyo. Alùkilaaku kwèbè kumbèlu; nekuumuke.

197 Kùdi mukàji mutekète kutàmba ewu. Ncyèna mukumanyè to. Nzambi mmukumanyè bulelèlè. Udi witabuuja nè Yèyè ùdi mwà kukusàngaja anyi? [Mwanèètù wa bakàji awu ùdi wàmba nè: “Èyowà.”—Muf.] Èè, alùkilà ku New Albany, Mandàmwanzèlè Pearl Allen, nè ùsangalè. Yesù Kilistò wàkwondòpù. Ndàaku, mwikàle uciitabuuja, udi mwà kusàngala.

198 Ikàlà nè diitabuuja mu Nzambi. Udi witabuuja nè mwoyi wèbè wònsò anyi? Mpindyewu, kabyèna...Kaa, kùdi bintu byònsò ànu munkaci mwà kwenzeka, lwà pa...Bu wêwè ànu mwà kuciitabuuja's, mulundà wanyì!

199 Wetwàwu, mukalenge? Udi witabuuja Yesù Kilistò Mwàna wa Nzambi anyi? Udi witabuuja nè mèmè ndi mupròfetà Wendè anyi? [Mwanèètù wa balùme awu ùdi wàmba nè: “Ndi ngiitabuuja.”—Muf.] Udi witabuuja nè cìndì mwà kukwambila aci. Udi mufwànyine kumanya bìmpè bitàmbe nè mbulelèlè anyi kì mbulelèlè. Udi witabuuja nè bìndì muiyishè pa bwalu abu, mu dindà emu, m'Bulelèlè anyi? [“Èyowà.”] Udi witabuuja cyà bushùwà. Udi kaaba aka mbwà cintu cìmpè. Udi kaaba aka bwà kulekela ciibidilu kampàndà, ciinè aci, nkunwà kwà mfwankà. Ndi nkumòna wêwè ucitàngila, nè upiisha cintu aci, nè ucyùmusha kùdi. Ncyà bushùwà. Kuteeci...bu wêwè...Tèeleja. Udi dijinga nè disambila bwà mukàjèbè. Yèyè ùdi nè cintu cyenzè bu cìnyinginyingu. Mukalenge Carlock, alùkilà ku Owensboro, mu Kentucky, kùdi mufùmine aku. Kùlengi mukwàbò mucì wà mfwanka to. Yesù Kilistò ùdi ùkusàngaja. Ndàaku, mu Dinà dyà Mukalenge, nè wòndopiibwè.

Udi witabuuja anyi?

200 Mpindyewu tàngilàayi. Muntu udi ulwa kaaba aka ewu, tentèkà ànu cyanza cyèbè pa cyànyì apa, mukalenge, kaaba aka. Nyimà uvwa ukusaama awu wàyi. Alùkilà wêwè ànu paanyimà apu, usàkidila Nzambi. Amen.

201 Udi muswè kuya kadyà didyà dyèbè dyà mundaamuunyà anyi? Disaamà dyà cifù adi nedikuumuke wêwè mucitabùùje.

Udi uciitabuuja anyi? Kwàta njila ndàaku. Nzambi àtumbè, nè ambà nè: “Twasàkidila, Mukalenge.”

202 Mbanganyi bàdi biitabuuja nè mwoyi wènu wònsò?

203 Nzambi àkubènèshè. Mùshindù awu, kàbidì, udi mwà kuya nè kutùmbisha Mukalenge. Kwamba nè: “Twasàkidila, Mukalenge.”

204 Udi nè lutàtù lùdì naalù bantu bààbùngì mwab’ewu, mijilu yà mutù mibìndùlùke, dìdì dìlubakaja mwoyi wèbè, dìsaamà dyà mwoyi.

205 Nwènu biitabùùje nè mwoyi wènu wònsò, nwènu abu... Mbanganyi bàdi ne mwoyi mubìndùlùke nè bikwàbò? Mpindyewu elàayi byanza byènu muulu mùshindù ewu. Tàngilà kùnweku. Mmunyi mùdiku mwà kubàbiikila? Nwamònu anyi?

206 Udi witabuuja nè mwoyi wèbè wònsò anyi? Udi witabuuja, wèwè pèèbè anyi? Èyo. Ndàaku wikalè mwondòpiibwe mu Dìna dyà Yesù Kilistò. Kwèdikù mpatà nànsha mikesè to, kàdi itàbùùjà mu cidi cikwambila aci nè m’Bulelèlè. Itàbùùjà nè udi mwondòpiibwe. Neupetè cyùdì ulòmba aci.

207 Nwènu bakwàbò nudi nwenza cintu cìmwècìmwè aci. Mbanganyi bakwàbò bàà kunùdì mwaba ewu bàdi naaci? Èyo, mukalenge. Mbanganyi kunùdì aku bàdi mu lukèngelu lwa Nzambi? Elàayi byanza byènu muulu. Nè nwambè... .

208 Tàngilàayi. Umvwaayi eci. Ncyèna mwà kwondopa muntu nànsha umwe to. Mèmè ndi muntu. Bu nè Kilistò ùvwa mwimàne kaaba aka, Yèyè kàvwa mwà kwondopa nànsha umwe wa kunùdì to. Ùvwa mwadije ndongamu kampàndà panshi, nè ndongamu awu ùdì nè udi witabuuja nè Yèyè wàkakufwila, udi mwà kwondopiibwa ku cyòci aci. Ke mùshindù wùmwèpelè ngwòwò awu. Ndiitabuuja dìdì dyondopa. Diitabuuja’s! Ùdi witabuuja nè Kilistò wàkakufucila mushinga. Mbanganyi bàdi buumvwa aci mpindyewu? Èyo. Mbanganyi bàdi biitaba aci? Èyo.

209 Patùdì tusambila apa, tentèkèlàngànaayi byanza muntu nè mukwèndè. Tentèkèlàngànaayi byanza muntu nè mukwèndè, muntu nè muntu sambilaayi.

210 Mpindyewu udi mwà kuya ku nkwasà wèbè, mwanèètù wa bakàji. Nzambi àkubènèshè mpindyewu. Ikàlà musàngàle...?..Èyowà. Aci’s ncyà bushùwà. Ndisaamà dyà dibìndùluka, kàdi nedì—nedìkuumuke. Tùùlukaàku kuntwaku mpindyewu, ùmòne ní cidi...Udi ubanga kudyùmvwa mùshindù mushiilàngàne, kì mmwòmò anyi? Nwamònu anyi? Bushùwà’s. Ùvwa mwondòpiibwe, paùvwa mwimàne ànu kaaba aka mene. Nudi numòna mùdiye ùtùùluka bibàndilu dībà adi kàyi naadi anyi? Nwamònu anyi? Nènkù mpindyewu udi bìmpè. Mpindyewu udi mwà kwalukila kumbèlu, kuumvwa bìmpè. Mukalenge àkubènèshè.

211 Mpindyewu nè byanza byènu bitentekelangana muntu nè mukwèndè. Nwamònu's, katwèna nè dîbà dyàbûngi to, tukàadi twipacila dîbà nkànkala. Nè bàcidi kàbidì, nè mudimu wà dibàtiiza.

212 Cyà bushùwà, cyà bushùwà, bantu wètù, Mwoyi munènè wà Nzambi awu, Nyumà Mwîmpè munène Uvwa kàyi ùpangilakù awu ùleeja nè Yèyè ùdipù, bìleeja nè Mwoyi wùdì wùfùmina ku Nkwasa wa butumbi wa Nzambi awu ùdi munkaci mwà kutuucila mu matàmbà amu, bwà kuleeja Mwoyi. Kanwènaayikù nwitabuuja nànkù anyi? Dîbà adi, to, ncitukù mwondòpe nànsha umwe wa ku bantu bàdi bàlwa kaaba aka aba to. Diitabuuja dyàbò dyàkacyèzza bwalu bàakabàmbila cintu kampàndà cidi bulelèlè. Bu nè wèwè uvwa kaaba aka, nùnkù's nCyènzè cintu cimwècimwè aci.

213 Mpindyewu kunùdì nwènù bàdi aku abu, Yèyè ùdi munkaci mwà kunùbuulwila cinùdì naaci dikèngela. Mpindyewu patùdì tusambila apa, bônso pàmwè, sambilaayi, nwitabuuje nè dîyi dyônso didi bulelèlè, kàdi nùmonè cidi cyènzeka. Nenwikalè mwà kwondopiibwa. Mpindyewu wèwè sambidilà muntu awu. Kùdisambididì wèwè mwinè to. Sambidilà muntu ùdi mutentèkèle byanza awu. Muntu awu àkusambidilè wèwè. Nusambidilangana muntu nè mukwèndè. Bible ùdi wàmba nùnkù mpindyewu.

214 Bible mwinè wákamba nè: “Byenzedi bìNdì ngèzza nenùbyènzè pèènu,” mmwàmbè nùnkù: “Bimanyinu ebi nebìfilè aba bàdi bìitabuuja. Bòbò batentèkèle babèedi byanza, babèedi nebàsangalè.” Mpindyewu, Nzambi wàkenza mulayi wùmwè, nè ùwùlama, wèwè mukùnyìibwe mu wòwò awu, ku kâlà kwà misùlù yà Màyi, Cidi citwàla Bwikadi bwônso bwà Nzambi, mulayi wônso, ànu mu dilamakana neebè. Wèwè udi mucì wùdì mukùna ku kâlà kwà misùlù yà Màyi àmwèpelè. Màyi àmwèpelè awu n’Kilistò, Nyumà Mwîmpè Wendè. Kùdi dyondopa. Kùdi lupàndù. Kùdi disànka. Kùdi mwoyi mule, bupòle, kalolo, lutùlù. Mapà à mîshindù yônso matèeka ànu mu Dîna dimwèpelè dyà mushinga mukole adi. “Cyônso cinùdì nulòmba Taatù mu Dîna Dyànyi, ke cîNgèzza.”

215 Mpindyewu sambilà mu Dîna dyà Yesù, bwà muntu ùdi mutentèkèle byanza awu. Mémè nênsambidile bônso, bwènù nwènù bônso. Nyumà Mwîmpè, udi kaaba aka mpindyewu awu, wòndopèku muntu yônso.

216 Mukalenge, tudi baswè kulòmba bwà musàngèelu Wèbè wùtungunukèkù neetù. Muntu nè muntu mulùme anyi mukàji ùdi ùsambila mu wèndè mùshindù sungasunga. Mbamòne Nyumà wa Nzambi udi nè mwoyi muvwijìibwe wa cyà bushùwà ànu mwàkadìYe mu Ngalèlè amu. Ànu mwàkadìbi pàakalwà Peetèlò kuntwaku ku mwelelu wà Ngalèlè, ke Yesù kumwambila nè yèyè ùvwa nganyi. Nènku ànu mùdibi bulelèlè ànu

pàakalwà Natànaèlè apu, ke kumwambilaYè mwaba wùvwàye ditùkù divwà didyànjlè. Anu bulelèlè mwàkadibi ku ciibi cyà Sàmaalèyà amu, anyi ku ciinà cyà mâyi. Ncyà bushùwà nè bantu mbafwànyine kwamba nè: “Eci n’Nyumà wa Nzambi udi nè mwoyi.”

²¹⁷ Mukalenge, filakù diitabuuja nè bwikadi bwà meeji, nè Bwikadi bwà Nyumà Mwîmpè, bwà muntu nè muntu, udi munkaci mwà kusambila, mmufwànyine kusambidilèku mukwàbò, disambila dyà diitabuuja. Ndi ndòmba mpindyewu, Mukalenge, bwà aba bàdì nè byanza byàbò bitentekela muntu kampàndà, bwà Wàbàpèèshakù diitabuuja dìdì kadiyì dishintuluka, ànu mpindyewu bwà muntu awu. Nènku, mu bushùwà bwà bwalu, aci nebàcipetè pashiishe. Kaa, enzàku nànkù’s! Mukalenge Nzambi, biikalèku nànkù’s! Tudi bafwànyine kulwa naabò, ku umwe ku umwe, pa cibùmbà cyà ku cyambilu apu, nè cipeta cimwècimwè aci; kàdì nànsha nànkù nebikengelè diitabuuja, diitabuuja mu muntu-nkààyà, bwà kwitabuuja Nzambi. Nènku bààkafùnda nè: “Bimanyinu ebi nebifilè aba bàdì biitabuuja. Bòbò batentèkèle babèèdì byanza, babèèdì nebàsangalè.”

²¹⁸ Éyi Mukalenge, lamà mulayi Wèbè mu dindà emu, kùdì mwena kwitabuuja yònsò. Nènku swàkù bwà Nyumà Mwîmpè àbwele mpindyewu mene mu mibidi yà babèèdì aba, nè ùmushèku mabèèdì ònsò nè mäsaaamà wònsò. Swàkù bwà kwikalèku dishindika dyà cyôci aci mu mùshindù wà nè myoyi yà bantu abu neyitupikè nè disànkà, biikalè munkaci mwà kwitabuuja nè Nzambi mmubàsàngàje. Swàkù bwà bùùmukè mu tabernacle emu, bìmba misambu nè bàcyònkòmonoka, nè biitabuuja nè Nzambi mmubàsàngàje. Swàkù bwà bààlukilè mu ditùkù dikwàbò dyà ngondo, nè disànkà, bènda bàcyònkòmonoka, bàfila majaadiki, mùdì nkàmà nè nkàmà mwà kufila bujaadiki leelù ewu pa buloba bujimà, bwà Bukolè Bwèbè bwà dyondopa abu. Disambila ditùdì tufila bwà bantu aba edi, tucilòmba bwà biikalè nànkù, mu Dîna dyà Yesù Kilistò Mwànà wa Nzambi. Swàkù bwà Bukènkè bwà Nzambi bùtangalakè nè bwòndopèku bònsò. Amen.

Ndi mwà, ndi muswè, ndi ngiitabuuja
bushùwà;
Ndi mwà, ndi muswè, ndi ngiitabuuja
bushùwà;
Ndi mwà, ndi muswe, ndi ngiitabuuja
bushùwà
Nè Yesù ùdì ùngondopa mpindyewu.

Udi ucyènza anyi? Elà cyanza cyèbè muulu.

Ndi mwà, ndi muswè, ndi ngiitabuuja
bushùwà;

Ndi mwà, ndi muswè, ndi ngìitabuuja
bushùwà;

Ndi mwà, ndi muswe, ndi ngìitabuuja
bushùwà

Nè Yesù ùdi ùngondopa mpindyewu.

[Katùpà kàà mukàbà wà mèyì munda mutupù—Muf.]...
itàbùùjà nànkù.

²¹⁹ Mwà mwà kukùmbula nzùbu yà bantu, nè bàvwa mwà
kulàmba cyàkudyà cìmpè cyà mundaamuunyà. Bàvwa nè cyà
kunsàbishila dikopo dyà màyi à luuyà, nè kunsòmbesha panshi
pabwìpì nè kaamusàbù kakesè kàà mpondà; pààbu nè bintu
bìmpè byà mishindù yònsò ku mèèsà. Dìngà ditùkù mèmè
kwambila Mukalenge nè: “Ndi ngìitabuuja. Ndi ngìitabuuja.”
Kaa, ekèlekèle! Mèmè kupweka nè mùsèèsù nè cyànyì cyakudyà
cikole cya kumpàla cìvwà cibwelaku mukana mwànyì mu difù,
ngènda ngimba nè:

Ndi mwà, ndi muswè, ndi ngìitabuuja
bushùwà;

Cìvwa mwà kuteeta kumpàtukila ku mishiku; mwà mwà
kucìminuna kàbìdì.

Ndi mwà, ndi muswe, ndi ngìitabuuja
bushùwà;

Ndi mwà, ndi muswe, ndi ngìitabuuja
bushùwà

Nè Yesù ùdi ùngondopa mpindyewu.

²²⁰ Èyowà. Aci's nkùkaadi bidimu makùmi àbìdì nè bitaanu.
Yèyè ùkaadi wa cyà bushùwà kùndì kacya ànu piinè apu. Ndi
ànu nè kusàkidila kwàbùngì bwà bwalu abu. Swàkù bwà cìikalè
cintu cìmwècìmwè aci bwèbè wèwè. Nzambì àkubènèshè.

²²¹ Mpindyewu nebènzè mudimu wà dibàtiiza, ànu mu tusunsa
tukesè cyanààna emu, ngèèla meeji; èyowà, mbwena kwamba
nè, kwòkò kwikàle bàmwè kaaba aka bwà kubàtijiibwa mu
Dìnà dyà Mukalenge Yesù Kilistò. Kwòkò bantu bàà mùshindù
awu, bwà twamòna mwà kutangalaja batèèleji anyi—anyi
kubàlamakù ànu kakesè cyanààna, nudikù mwà kwela byanza
byènù muulu kòkò muntu kampàndà udi nè cyà kubàtijiibwa mu
Dìnà dyà Mukalenge Yesù anyi? Ùmwè, bàbìdì, bàsàtù, bànaayi.
Èyo. Bu bakàjì mwà kuya ku *elu* luseke, nè balùme lwà *eku*, bwà
didìlongolola, bu nwènù mwà kuswà. Patùdì twimba musangu
ewu kàbìdì apa, *Ndi*. . . 

59-0920 Kukùna Mwonjì Wà
Mvinyò Nè Mwaba Wà Kuwùkùnyina
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org